


Basilio Pujana

# Oiuak



25454  
G48-128/107



# Oiuak

---

SENDOA ARGITALDARIA

Ugaldetxo auzoa

Tel. (943) 49 35 51 - 49 35 52 - 49 35 53

Fax (943) 49 35 48

20180 OIARTZUN (Gipuzkoa)

**Basilio Pujana**

---

# Oiuak

---

Auspoa Liburutegia  
(1997)

© SENDOA ARGITALDARIA

Fotokonposaketa eta inprimaketa: ITXAROPENA, S.A., Zarautz

ISBN: 84-89080-60-7

Legezko Gordailu: S.S. 1210/97

# Azken arnasara arte

---

**N**IK lenengoz entzun neutsien bertsolariak izan ziran Esteban Uriarte, Dimekoa semez, ezkondu ta gero Bermeon bizi zana, eta Kepa Enbeita, Zeanuriko plazan, Agoztuko Andra Mari jaietan, 1927-an edo olan uste dot.

Egun atan izan zan antziñako eztegu zarraren erakusketa. Aldi atan ni mutiko nintzan, baiña agure jantzita joan nintzan Mateo Gordoren arropakaz, oso txukunak eta txaleko botoi kaskabeldunak; eta ezteguaren amaieran izan ziran len aitatu-tako bertsolari biok.

Aldi atan ez zan usu bertsolari bik baiño geiagok kantatzea. Bearbada izango zan bertsolari gitxi egon ziralako.

Izentatutako biek egin eben ekitaldia, eta ekitaldi orretan aitatu eben, beste askotatik, zenbat seme-alaba euken bakotxak. Enbeitak esan eban ez dakit zenbat, eta Uriarteren erantzuna:

– Egingo neuke juramentu, seme oitatik bat baietz egin Aite Santu.

Eta Enbeitak onela asi eban erantzuna:

Juramentuak geldi-geldikan  
au berba astuna da ta.

Eta orrela jarraitu eban. Uriarte zirikatzailea zan, baiña zorrotza be bai; bertsolari txirpia. Enbei-

ta, barriz, bestalde, sakona ta serioa. Orregaitik, niri beintzat berea sartu jatan belarritik biotzeraiño, eta gaur arte emen daukat.

Orduko bertsolariak alkondara zuria goraiño, samaraiño, loturik eukela asten ziran kantatzen. Baiña, lenengo bertsoa kantatzean, goiko botoia askatzen eben. Zeremoni bat zan ori.

Euran saioaren ostean, ordurako be baneunkan lez bertsoaren izpia, eurak amaitu ta gero bertan kantatu neban nire lenengo bertso-antzeko bat:

Ez dakit erderaz ta  
ta gitxi euskeraz,  
eta emen nago laro-  
getabost urtegaz.

Agure jantzita nengoalako izan zan ori.

Gero, errepublika etorri zanean, asi ziran batzokiak zabaltzen; eta, Zeanurikoa inauguratu zanean, ekarri eben Enbeita bere seme Sabinekin.

Aldi atan, Sabin geiago entzuten zan, Arrati aldean beintzat, Balentin baiño. Neuk Balentin eneban ezagutu gerra ostera arte. Gero Sabin isildu zan eta Balentinek ekin eutsan jo ta ke, bertsolari ospetsua egin arte.

Nik Sabinekin eneban egundo bertsoan egin, eta bai Balentinekin ainbat bider. Ondo konpontzen giñan.

Len esan dodan lez, Zeanuriko batzokiaren inauguraziñoko egunean izlariak izan ziran Lauaxeta eta Polisene Trabudua, aldi atako izlaririk oneitako bi.

Baita kantatu gendun Jose Mari Artetxek eta nik be; eta Bilboko *Euzkadi* egunkarian agertu zan Lauaxetak esan ebana: bertsolari-promes onak giñala.



Ortik aurrera ezin burutik kendu bertsoaren doiñua beintzat, eta *sirrist* eta *sarrast* eldu naz gaur arteiño.

Aldi atako plaza-bertsolariak, zerbait entzuten ziranak, Euskal Erri guztian be dozen erdi bat izango ziran, ez asko geiagorik: Bizkaian Kepa Enbeita ta Uriarte; Gipuzkoan Basarri, Uztapide, Zepai eta besteren bat, azpeitiarra uste dot, Txapel.

Onein aurretik beste on asko zegozan istorian zear leku guztietan, batez be Gipuzkoan, bertsolari ospetsuak. Baiña, Txirrita kendu ezkerro, nik neuk enebazan ezagutu. Txirrita ikusi neban bein Urkiolan.

Gaur egun, bertso-saio baten, zorionez, lau, bost edo sei bertsolarik artzen dabe parte. Aldi atan, tamalez, leen esan dodan bezela, geien agertzen ziranean, bi alkarrekin; eta sarri askotan, Kepa Enbeitari jazotzen jakon moduan, bakarrean.

Orrela jazotzen zan bertsozaleakaz, eta nigaz be bai: non izaten zan bertsolaria, ara joaten giñan entzutera, Erromako Aita Santua sermoi egitera etorri balitz antzera.

Nik Kepa Enbeitagandik artu neban nire barruko beroa, euskaldun batzuek ulertu ezin daben bertsoaren aparteko sua; eta sarri parabolaren antzera emoten dabe epai.

Bai; neuk amagandik artu neban bere bularretik bertsoaren bateoa. Baiña sendotza, Kepa Enbeitagandik.

Nire errian, Zeanurin, entzun neuntsan iru edo lau bider, eta beste bein Bedian, bertako batzokia inauguratu zanean, 1933-an. Bedia ontara bizikletan joan nintzan, nitzako beintzat akontezimientu andi bat zala ta.

Zori onez, orrela emon dau bertsoak frutu ona



*Basilio Pujana*

Ni nire errian ezagutu ninduenean zerbait izan neitekela, baneukan laguntasuna bertsoan jarraitzeko. Zurrumurru bat eldu zan nire belarrietaraiño: Zeanuriko jaun batzuek, bertsozaleak eta bertsoa zer dan ondo ausnartzen ebenak, aitatu ebela, Keparen ondoan edo inguruan ibili naiten, bere etxera morroi edo olan bialtzea. Baiña or gelditu zan.

Eta, aldi atan iñon ezer ezin zan lez ikasi fraile edo olan joan izan ezik, or gelditu zan guztia nire arduran; eta gero, etorri ziran laiño baltz, trunboi eta kaiñonazo artean, gaur arte egin dodana baiño ez dago, baiña jakin daitela zer jazo dan edo jazo zan.

Orduko jendeak Kepa Enbeitari entzuteko eukan gogoa, Mesias mundu onetara etorteko zanean eta etorri zanean erriak eukan guraria bezela, bere dotriña ekarteko zanean. Orrelan egoten giñan asko Keparen abotsa ta bere bertsoa entzuten, esaten eban guztia zalako justizia ta askatasuna. Ni, beintzat, eta beste asko be, pentsatzen egoten giñan izar bat baegola guri argi egiten. A zan aurrera jarraitzeko indarra.

Keparena zan, esaten dan lez,  
urretxindorren abotsa,  
biotzeraiño sartzerakoa  
oiñeztua lez zorrotza.  
Errazoi eta egien alde  
etzan izan iñoz lotsa,  
eta orrela itxartzen eban  
euskaldunaren biotza.

Nire adiskide Abel Muniategik, alkarrekin egini-ko azken aldiko berbaldi baten, aitatu eban gazte denboran gaur lako serioa edo sakona enintzala izango; eta nik erantzun neban:

– Orduan, gazte denboran, berde; eta zartzarotan, eldua.

Eta, bestetik, bertso arloan neunkan zorra ordaintzeko al dodan guztia saiatu bear nebala azken arnasara arte, niri eginiko omen baten promes egin nebalako:

Umetxotatik gure bertsoa  
beti izan neban maite,  
baiña egundo be ez naz izan  
omen bat artzeko beste.  
Nik gaur egin dot omena artu  
ta betiko zorrez bete,  
anai-arrebok, biotzez diñot  
ta or ziur egon zaitezte,  
zor au ordaintzen saiatuko naz  
azken arnasara arte.

Au zan esker emonez kantau neban bertsoa. Bearbada, Muniategi be gogoratuko da, bera izan zan neu aupatu nindutenetariko bat eta. Eta oraindiño zor au ordaintzen nago, Jaunari esker.

Bertso-paper sariketa bat izan zan, 1963-an Gipuzkoako Aurrezki-Kutzak antolatua edo bai beintzat berak babestua Euskaltzaindiagaz, eta lau sari izan ziran: 2.000 pezeta lenengoa, 1.500 bigarrena eta 1.000 irugarrena, gipuzkoarrak irabazi ebezanak. Eta laugarrena 500 pezeta, eta orretan neu izan nintzan irabazlea, Gipuzkoatik kanpoko lenengoa.

Orixe da orain, al dodan arte, nire egin bearra; eta egin bear orrek bultzatuta nabil ni al dodana egiten.

Nire bete bearra au izan ez balitz, bearbada eneban egingo egin dodan apurra be; eta, nire lan pobre au erriarentzat zerbait ona bada, niretzat be bai, ta guzientzat obeto.

# Nire bertso ondakiñak

---

- 1 Amasei urtez egin nebazan  
nire bertso esamiñak,  
eta gaur arte bera indartzen  
egin dodaz alegiñak.  
Naita askorik ez dau balio  
nire bizitzan egiñak,  
liburu ontan jarri nai dodaz  
nire bertso ondakiñak.
- 2 Bertsoa maite izan dot baiña  
benetan nire bizitzan,  
nire aldian kantatuteko  
erretasun asko etzan.  
Ezin izan zan kantatu eta  
orduho bertsolaritzan,  
laiño baltzetan galdu ez daiten  
idaztera jarri nintzan.
- 3 Jakin guztiok ez daukadala  
eskoletan ikasirik,  
pentsamentuak azaltzeko be  
ez dot patxada andirik.  
Borondatea bakarrik daukat  
al dodana egin nairik,  
bada mundu au ez dot nai itxi  
al dodana egin barik.

4 Bertsolai zarrak kantatzen gendun  
geure euskera garbian,  
gaurko gazteak kantatzen dabe  
euran euskera barrian.  
Euskera ori sartu ez arren  
zoli gure belarrian,  
batez be ondo sartu dedilla  
gogotsu gure errian.

# Lazkao-txiki zanari

---

- 1 Lazkao-txiki zan Lazkaon jaioa,  
iñon bez azitakoa,  
zabala etzan eta alturan  
metro eta erdikoa.  
Gizontasunez ain zan aundia  
neurtu be ezindakoa,  
milla bertsogaz aupatuta be  
ez da jasoko naikoa.
- 2 Igarlearen maillako ziran  
bere bertso nai txisteak,  
entzuleentzat alaiak kantau,  
barruan gorde tristeak.  
Bera samiñez aurkitu arren  
asko alaitu besteak,  
santu andien neurria dauko  
olakoa izateak.
- 3 Lazkao-txiki joan zan baiña  
gogoan dogu sarriten,  
bada alako gizon argiak  
egundo ez dira ilten.  
Batzuek diñoie goian dagola  
izar andien argiten,  
baiña nik diñot bera dagola  
izarrai argi egiten.

- 4 Sarritan nago begira adi  
goiko izarretarantza,  
zein izarrekin argitu ete zan  
munduan zure jaiotza.  
Lau aixetatik dabil betiko  
kantari zure abotsa,  
au isiltzeko ez da naiko ta  
munduan dan eriotza.
- 5 Gure erriak lenagotik be  
oso argi onak ditu,  
ta orain barriz zorionean  
Lazkao-txikirena piztu.  
Gure bidea badaukagu be  
aldatz gora eta estu,  
Jaunari esker argi dogu ta  
badogu nondik jarraitu.
- 6 Berak eukazan doiak zirean  
normaletik aparteko,  
borroka eukan gizona zer dan  
ta gaiñera zertarako,  
mundura nondik datorren eta  
gero mundutik norako.  
Ola sinisten daben gizonak  
eriotzarik ez dauko.
- 7 Zeru goietan ikusten dira  
izar ederrak dizdira,  
eta jartzen naz adi-adirik  
ni zureari begira.  
Zure izarra aupatuteko  
nire indar danak dira,  
baiña nik ezin iñoz goratu  
merezi dozun tokira.



8 Gauza bikain bat aitatutean  
diñogu urre gorria,  
baiña zu lako balore batek  
bear dau izen barria.  
Esango neuke zeu ziñeala  
apartetik etorria,  
bada munduan ez da agertzen  
zu neurtuteko neurria.

9 Jakitun batzuk dudan daukaguz  
or bide-kurutze baten,  
mundu ontatik urten ezker  
ezer ez dala esaten.  
Lazkao-txikik etzun dudarik  
duda au erabagiten,  
bere jokera ikusirikan  
zerbait badago nonbaiten.

10 Samiñez nago irakurririk  
Lazkao-txikiren eskela,  
gaur nok osatu ez daukagu ta  
au mundu erdi ustela.  
Zeruko Aita, otoian nago  
kendurik nire txapela,  
eskari au da: Lazkao-txiki bat  
barriro sortu daitela.

11 Ze eratako gizona ziñan  
bertsoz ezin esan leike,  
gure erria askatu daiten  
beti justizia eske.  
Naita biotza samiñez euki  
eta gorputzean neke,  
erri ta lagun urkoen alde  
zu beti ziñan jo ta ke.

12 Ez dakit zer esango leukien  
len bertsolari ziranak,  
baiña ez dakigu zer esan bere  
berakin izan giñanak.  
Parabolaren antzeko ziran  
sarriten bere esanak,  
gizon leun eta jakitunak be  
neurtu ezin leikezanak.

# Bizkaiko gotzaiña

---

- 1 Gure Bizkaian bear genduan  
Elizarako gotzaiña,  
eta kanpotik etorri jaku  
emen bageunkazan baiña.  
Elizan bere sartu diran lez  
Euskadi eta Espaiña,  
joko orretan ikusten dogu  
politikaren usaiña.
  
- 2 Gure erria beti izan da  
kristautasunez beroa,  
ta bero orren bultzakadeak  
au esatera naroa:  
maliziakin egiten danak  
bide onik ez daroa,  
ta begiratu zer izango dan  
bide txarraren geroa.
  
- 3 Orain gotzain bi aurkitzen dira  
emen obispadu baten,  
bata daukagu euskalduna ta  
bestea orain ikasten.  
Bien artean Bizkaiarako  
naiko ez badabe egiten,  
frantzes bat edo beste ekarri  
irukotxa izan daiten.

- 4 Oraindik urte asko ez dala  
begiratuz atzerantza,  
obispo batzuk itxi euskuen  
usain txarra edo atza.  
Izurratuta oraingo ontan  
gagoz kokotean azka,  
ta kanpokoia bear badogu  
ekarri Kongoko baltza.
- 5 Euskal Erria beti izan da  
gogorra baiña apala,  
Jesukristoren lege barruan  
biotz ta esku zabala.  
Baiña badatoz azpikerakin  
egiñazoten *trágala*,  
aurreragotik jakin daiela  
alperrik izango dala.
- 6 Kanpotar eta mundu guztiaz  
jakin bear da konpontzen,  
baiña batzuen jokaeragaz  
gagoz konfiantza galtzen.  
Lendikan emen dagozanokin  
ikasi dogu alkartzen,  
txarrenak dira daukaguzanak  
erriz kanpotik agintzen.
- 7 Euskal Errira sartu ziran lez  
otsoak bildots jantzita,  
idurimenez artzen dogu gaur  
kanpotarraren bisita.  
Iru zakugaz gagozan legez  
lendikan izurratuta,  
orain egia badiñosku be  
gagoz ezin sinistuta.

- 8 Eneuke gura bein jazo zana  
esaten ekin ta ekin,  
baiña baten bai esan bear dot  
danak egin daien jakin.  
Espaiñiako obispo batzuk  
portatu zirala zikin,  
eta tamalik andiena zan  
goragokoak eurakin.
- 9 Gure Jesusek apostolui  
agindua au izan zan:  
"Nire dotriña danai zabaldu  
ta danai euran izkuntzan".  
Baiña guztian borrokalari  
garala ez daien esan,  
Kristok esana bete daiala  
ta ortaratu gaitezan.
- 10 Gotzain jaun oni jazotakoa  
da gauza bat gogorrena,  
Euskadirako ez dakiala  
gauza bear-bearrena.  
Eta bestetik bete bearra  
goitik datorren ordena,  
naita errudun ez da izaten  
aginduta datorrena.
- 11 Kristau dotriña egin zanean  
gure Euskadira sartu,  
bera zalako akatsik bako  
bertan egin zan onartu.  
Orain batzuek obetu naian  
zerbait gura dabe nastu,  
guk ez dogu nai oberik eta  
lengoaz daigun jarraitu.

- 12 Atxaki bako argia dogu  
Jesukristoren dotriña,  
Kristo bera be Jainkoa da ta  
ori da berak egiña.  
Orain jaun batzuk egiten dabe  
aldatuten alegiña,  
ondo dagona aldatu naia  
ez al da joko zikiña?
- 13 Euskal Erriko dotriña dogu  
Kristo beraren antzeko,  
eta ez dago besterik iñon  
Kristorena obetzeko.  
Orain jaun batzuk artega dabiz  
euran erara sartzeko,  
borondatea ona badabe  
itxura onik ez dauko.
- 14 Euskal Errian lendik daukaguz  
eliz jakitun ugari,  
irakasteko nondik jarraitu  
zuzen erritar danari.  
Maixu barriak ipinitea  
len ondo dakianari,  
arraioa!, nik ez dot ikusten  
orren argi dagon ori.
- 15 Kristo izena entzun bakoak  
gaur ei dira urrintan,  
au olan bada badago lana  
oraindik arlo orretan.  
Ta obispoak ona bialdu  
naikoa eukita bertan,  
ori ez dago ain garbi eta  
ez gagoz ados orretan.

- 16 Berba on asko aolan dala  
kanpokoia sarri dator  
geuri esaten: "Zoriona ta  
bakea iskintzen nator".  
Baiña errian lendik badoguz  
gizon argitsu ta jator,  
kanpotarrikan ez dogu bear  
bide onez ez badator.
- 17 Europa aldean Euskadi dan lez  
bearbada biurrena,  
obispoak be ementxe dauke  
lanik eta gogorrena.  
Baiña obispo ona izan leike  
gogo onez datorrena,  
ta Blázquez jauna izan daitela  
Añoberos bigarrena.

# Tantaka

---

*Loba baten semearen bateoan:*

Aspaldi ontan enaiz ibili  
plazetan bertso kantari,  
baiña zertxobait kantako dautsat  
gaur lako egun bateri.  
Aingerutxo bat biurtu da ta  
gaurko ontan kristau barri,  
kristau barri au iskinduteko  
zeruetako Aitari.

*Mutil zar bati:*

Gaur ezkonduak baiño obeto  
bizi dira mutil zarrak,  
bizitza ondo igaroteko  
ez dira elementu txarrak.  
Lorik ez dautse kentzen orrela  
ume txikien negarrak,  
eta gaiñera eurak ez dauke  
zeiñek ipini adarrak.

*Lauaxeta zanari:*

Lauaxeta, zu nor izan ziñan  
nik ondo ezin azaldu,  
zeure erria maitatzearren  
munduko bizia galdu.



Baiña alan be zeure oiua  
lau aizetara zabaldu,  
ta aizetara botatzen dana  
iñok ezin dau isildu.

*Francok txarrai dei egin eutsen orduan:*

Demokrazia zapaldu eta  
ostikoperatutzeko,  
gaizto guztiai dei egin eutsen  
bere alde etortzeko.  
Deabrua be bertan izan zan  
orretan parte artzeko,  
baiña Francok au ez eban artu  
naiko txarra etzalako.

*Amerikanoak medizina bota ebezan orduan:*

Mundu guztiak fariseoen  
jokoak egiten ditu,  
Amerikako ipar aldeko  
asko be ezin sinistu.  
Gerran *misilak* metro bateko  
zirkulu txikian sartu,  
ta Ruandako janariakin  
lau kilometro erratu.

*Anaia Amerikatik etortzea eta agurra:*

Maiteak alkar besarkatzeko  
etorri ziñan gugana,  
minutu bi lez igaro jaku  
iru illerako zana.  
Orrek diñosku laburra dala  
munduan jazotzen dana,  
orain barrero joan bearra  
ango maitetxoakgana,  
odol berotan eroan gure  
besarkada bero bana.

*Gazte dirudun bateri:*

Sarri askotan entzundakoa  
ekarri daigun gogora:  
gaztetasuna eta dirua  
dirala su ta polbora.  
Gauza bi orreik daukazan orrek  
ez badau zerbait ganora,  
su ta polborak alkar jotzean  
dana doia ankaz gora.

*Aita Lino Akesoloren omenaldian bazkal ostean:*

Orain nai eta lenago baiño  
lana askoz geio kosta,  
Aita Linoren argia ez da  
oraindik ilunak jota.  
Ez daigun pentsa amaitu dala  
omen egin jakola ta,  
oraindik beintzat Aita Linori  
errekienik ez bota,  
gaur egun bere Aita Linoren  
motorra martxan dago ta.

*Begoñazpi ikastolari:*

Ikastola au sortu zanetik  
aurten ogetabost urte,  
berari esker gure euskera  
gaur da indar barriztute.  
Gure erriko izkuntza da ta  
danok egin daigun maite,  
eta bizirik iraun daijala  
munduaren mugararte.

*Igorren lenengoz gudari-eguna ospatu zan egunean:*

Ezin sinistu ze ikusten daben  
gaur emen nire begiak,  
gerran bizia jokatu gendun  
gudari agurgarriak.  
Baita eurakin emakume ta  
gaurko gudari barriak,  
geure aurretik geugaz batera  
gure parlamentariak,  
ez ikaratu badau arnasa  
oraindik gure erriak.

*Gure ikurriñari, gerra ostean gudari-egun baten:*

Ikurrin maite, ezautu dozuz  
espetxeetako lexak;  
egia esan, ez dozuz izan  
ainbeste urte errezak.  
Baiña burua jasotzen dau ta  
egi garbi ta artezak,  
zu ikustean betetu dira  
gure biziko ametsak.

*Berriatuako erriak bere burujabetza lortu eban urtean:*

Erritar guztiaren  
kemenen frutua,  
bere burujabetza  
barriro lortua.  
Zorion emoteko  
or nire kantua,  
gora askatasuna  
ta Berriatua!

*Aita Lino Akesoloren beste omenaldi baten:*

Erri batentzat sakratua da  
jatorriz daukan kultura,  
eta erriak jaso bear dau  
kultura au bere lekura.  
Kontuan artu Euskal Errian  
ardura ortan geu gara,  
Aita Lino, zu arlo orretan  
age sendo bat zeu zara,  
gure erria allega daiten  
munduaren elmugara.

*Bake-urtea ospatu zanean:*

Aita Santuak bake-izenez  
bateatu dun urtea,  
munduarentzat izan daitela  
zorion utsez betea.  
Samin garratza gozotu eta  
arindu daiten nekea,  
seaskatxotik emon dauskula  
Ume Jesusek bakea.

*Euskal Errian uriolak izan ziranean:*

Euskal Erria zapuztu dausku  
uriolak ezbearrez,  
maiteak urak eroan eta  
famili asko negarrez.  
Ola jausita dagon erri bat  
jasotzen ezta ain errez,  
baiña guztia burutuko da  
fedo sendoen indarrez.

*Lauaxetaren gorputzkiñak Gasteiztik Mungiako  
ortu santura ekarri ziranean kantatutako bat au  
izan zan:*

Lauaxeta, bai, zu izan ziñan  
euskal loratxo liraiña,  
ta badakigu zein izan zendun  
azken orduko samiña:  
zure gogoak nai izan eban  
lora agertu eziña;  
baiña aixetan or dabil gozo  
loratxo orren usaiña,  
beti-betiko izango dana,  
zu igertu ziñan baiña.

*Bazkal aurre batean:*

Mai eder auxe orain izan da  
errezuz bedeinkatua,  
ta errezu au apainduteko  
bertsolarien kantua.  
Naita izerdiz guztia dogu  
Jainkoagandik artua,  
on egiteko izan daitela  
mai onetan dan frutua.

*Erretore jaun barria erri batera etortzerakoan:*

Aingerutxoak dabiz egazka  
gaur emen inguruetan,  
misteriozko gauza andi bat  
jazoten dalako bertan.  
Artzai barri bat sartu da eta  
Jaunaren artaldeetan,  
erri txiki au Jaunan aurrean  
andia dogu benetan,  
raskazielorik ez dago baiña  
Jaungoikoa arimetan,

ta gizonaren anditasuna  
bere egite onetan,  
ta erriaren anditasuna  
erritarren biotzetan.

*Estibalitzko Ama Birjiñaren aurrean:*

Kurutzetikan esana dogu  
Jesukristo gure Jaunak  
Birjiña dala guztion Ama,  
gu bere seme-alabak.  
Begoñan dauko Bizkaiak eta  
Estibalitzen Arabak,  
ementxe dago parbolea:  
irudi bi eta Ama bat.

*Begoñako Amaren aurrean:*

Begoñako Ama, Ama laztana,  
Amatxo gozo ta samur,  
barrero nator zure aurrera  
eta biotzetik agur.  
Urrinetatik ibili arren  
gogoz bai euki zaitut ur,  
zuri eskerrak arriskuan be  
iñoz enaz izan bildur.

*Egunsentian:*

Sorkaldetikan etorri jaku  
beste egun bat barria,  
eguzkiagaz bialdu eta  
maitasunezko argia.  
Osasun-bide izan dagigun,  
dizdiratsu ta garbia,  
maitasunagaz erakutsita  
zelan dan maitagarria.

Jaunan eskutik artutzen dogu  
guk ondasun ugaria,  
gure izatea zeurea dan lez  
egin zeure guraria.  
Geuk be biotzez egin nai dogu  
otoitza ta eskaria,  
au egin ezik artutzen gagoz  
geuretzat ez dan saria.

# Lenengo jaunartzeetan

---

1 Gaurko egunak bertsoak eta  
geiago merezi ditu,  
ta gura neukez une onetan  
bertsoak beintzat abestu.  
Gure euskera eztakianak  
egin daistela parkatu,  
eta euskera dakizuenok  
mesedez ondo aditu.

2 Zeruetara dagon bidea  
aldatza eta iluna,  
igaroteko bearrezko da  
argia eta laguna.  
Lagun ona ta argia dogu  
Jesus gaur artu dozuna,  
beragandikan ez aldendu ta  
ez aztu gaurko eguna.

3 Au dogu, au, poz zoragarria  
gaur emen ikusten dana,  
ume alaiak pozez beterik  
jatorkuz Jesusengana,  
eta biderdi dator zerutik  
Jesus Jainko eurakana;  
ondo artuta emon besarka  
guztiok mosutxo bana.



4 Aingerutxoak dabiz egazka  
gaur emen inguruetan,  
euran lagunen egun andi bat  
ospatzen dalako bertan.  
Gaur artu dabe lenengo aldiz  
Jesus euran biotzetan,  
au ikusirik nok eztaukagu  
poza gaur etxe onetan?

5 Egun andi au asi dagigun  
kristau zintzoen antzera,  
alai-alairik gatoz guztiok  
meza ontan alkartzera.  
Jesus be badator da  
geugaz alkartuko da  
geure guztion artera,  
egun eder bat igaro daigun  
danok berakin batera.

# Bertsoaren bideetan

---

*Lexotiren omenaldian, 1989-I-15-ean:*

Urtea etorri, urtea joan  
eta urtea etorri,  
aurtengoan gaur alkartzen gara  
bertsozale, bertsolari.  
Aurtengo ontan goratarrea  
gure anai Lexotiri,  
lagun Lexoti, alaitasuna  
besterik ez da agiri,  
egun andi au izan zaizula  
zeure biziko pozgarri.

*Jose Lizasoren omenaldian:*

Zoritxarrean gaurko mundu au  
maitasunean da gaixo,  
arlotan bada gizon bat  
maitasunezko itxaso.  
Beartsuentzat esku zabal ta  
jausita dagona jaso,  
negarrez dana alaitu eta  
saminduarentzat gozo,  
geure artean dago gizon au,  
au dogu Jose Lizaso.

*Juan Mugartegiren omenaldian:*

Zu, Mugartegi, gaztetxotatik  
ziñan bertsolari argi,  
ta erriari kanta dautsazuz  
ainbat errazoi ta egi.  
Buru gordetzen ibili barik  
beti aurpegiz aurpegi,  
eta omen au artu arren be  
bearbada gazteegi,  
ondo merezi dozuna da ta  
zorianak, Mugartegi.

*Madariaga anaien omenaldian, 1988-I-18-an:*

Bertsolari ta bertsozaleak  
gaur urteroko batzarra,  
emen gara gu Euskal Erria,  
egoia eta iparra.  
Igezko urtean omendu gendun  
Azpillaga bizkaitarra,  
aurtengo ontan Madariagak,  
anai bikote naparra,  
eurarekin bat agurtu daigun  
Nafarroa anai zarra.

*Nire lagun eta erritar zan Jose Mari Artetxe  
bertsolariari:*

Gizon andiak esana da ta  
oso nago sinisturik:  
bere errian ez dauka iñok  
igarlea izaterik.  
Au sinistuta ziurtasunez  
indartsu esaten dot nik:  
zure errian ez dagoala  
zeu ezaututzen zaitunik.

*Lopategik txapela irabazi eban urtean:*

Ze alde dagon gure bertsoan  
atzo edo gaur ikusi,  
len aldi baten egon gintzazan  
egingo ete zan jausi.  
Gaur zorionez indartu da ta  
txalo bat baidau merezi,  
Naparroa ta Gipuzkoak be  
arlo ortan irabazi,  
gure Bizkaiak zer egin dausku  
izateko danen nausi?

*Donostiako bertsolari-egun batean:*

Emen gara gaur Euskal Erria  
egoia eta iparra,  
egun onetan egiten dogu  
anai guztion batzarra.  
Gaur Donostira zuzendu jaku  
gure bideko izarra,  
goazan berakin alaitu daigun  
geure aberri bakarra.

*Illoba Jabierrek nire omenaldian kantatua:*

Nik zuregandik artua daukat,  
aitite, bertso-eskola,  
ta zuregandik nire zanetan  
bero daukadan odola.  
Aitortutzen dot arlo orretan  
erne barria nagola,  
baiña geroan izan nai neuke  
zure antzeko arbola.

*Markiñako komentuan bertsolari-egun baten:*

Bere indarrez urruturikan  
ekaitz gaizto eta laiño,

eguzkiaren izpi zorrotz bat  
sartu da gaur bertaraiño.  
Onek diñosku Jaunan grazia  
badogula oraindiño,  
au ikusirik, lagun maiteok,  
nire biotzak gaur diño  
batzuntzat egun bat geio dala  
askontzat eun urte baiño.

*Deunoro Sardui bertsolariari:*

Barriz nire eskerrak,  
bai, lagun Deunoro,  
esanak esateko  
ete gagoz zoro?  
Egi zuzena ezta  
labur ta luzaro,  
egia betiko da  
orain eta gero.

*Dimako Faustino Etxebarria bertsolariaren omenaldian, alkate jaunak bitarte baten kantatzeko:*

Lagun Faustino, gaur artzen dozu  
erriko omen beroa,  
zure lan ona eskertu eta  
aztu ez daiten geroa.  
Lan eder ori ez da izan da  
barru utsa ta zoroa,  
ni gatxak jota nagoan lez gaur  
bere bidetik naroa,  
baiña presentziz or ez banaz be  
or dago nire gogoia.

*Egaña bertsolariari:*

Nik ez dakit zer izan gintzazan  
len bertsolari giñanak,

baiña gaurkoak merezi dabez  
benetako zorionak,  
jakitunenak, ezjakiñenak  
ta euskaldun guztionak.  
Ain ziran bertso bikaiñ-bikaiñak  
neurketan entzun ziranak,  
entzule eta epailleak be  
neurtu ezin leikezanak.

*Bertso-papel idazleen omendaldian:*

Gure bertsoak igaro eban  
gaba ilun ta luzia,  
indar zantarrak kendu nai eutsan  
betiko bere bizia.  
Baiña an zegon argi egiten  
bertso jartzaillen zuzia,  
frutu ederrak emoten dago  
eurak gordeko azia,  
txalo bero bat gaur eurantzako  
oso ondo merezia.

*Antonio Zabalar, bere omenaldi-egunean, Derion,  
1997-ko uztaillaren 11-n:*

Zorionean aurkitu zendun  
zuk urre gorrizko giltza,  
giltza orrekin idikitzeke  
bertso zar askoren kutxa.  
Iltzat zegoen bertso zarrari  
emon dautsazu bizitza,  
eta orrekin aberastu be  
euskaldun bertsolaritza.

# Arzallus eta Garaikoetxea

---

- 1 Abertzaleok burutu giñan  
bai odol asko kostata,  
batzuek nausi izan nai eben  
orduan kostala kosta.  
Eta erriak aututariko  
aita be kanpora bota,  
orain or dabiz aiten etxea  
zuzendu bear dala ta,  
etxerik ezin leike konpondu  
aita kanpora botata.
- 2 Erria sentitzen ez dabenak  
agintzea badaroa,  
onek defendituko dau beti  
bere poltrona beroa.  
Biotza daukat negar-puntu ta  
au esatera naroa:  
zapalkuntza ta negarra bazan  
orain arte igaroa,  
askoz txarrago ikusten da gaur  
aberriaren geroa.

3 Gure Sabino gaur emen balitz  
jarriko zan arrituta,  
ikusirikan bere dotriña  
bide okerra artuta.  
Buru batzuek egotearren  
kanpotarrakin nastuta,  
sinistu bere ezin leike gaur  
erritar batzun konduta,  
kanpotarrari emoten dautse  
abertzaleai kenduta.

4 Sabin Arana, garbia dogu  
benetan zure dotriña,  
ta bera zaintzen igaro zendun  
kartzelan zigor samiña.  
Traiziñoa da dotriña orri  
anai batzuek egiña,  
zeure etxean aurren jarrita  
egiñik joko zikiña,  
danak kanpora botako zeunkez  
gaur etorriko baziña.



# Biotz samindua

---

- 1 Une danetan dogu  
zerbait egiteko,  
orregaitik ez itxi  
ezertxo geroko.  
Joan zana joan zan  
joan be betiko,  
eta geio erarik  
ez dogu eukiko.
  
- 2 Buruauste gogorra  
gizonarentzako:  
denpora gitxi eta  
egin bear asko.  
Galtzen bada errua  
ortan berak dauko,  
sarri gauza utsetan  
itotzen dalako.
  
- 3 Egirik andiena  
dogu Jesusena,  
Aitagandik artua,  
garbi ta zuzena:  
munduan dagoana  
dala guztiona,  
aberatsak entzun be  
gura ez dabena.

- 4 Kontzientzi guztiak  
argitan balegoz,  
alkar begiratzeko  
bai ederrak gagoz.  
Fariseoen berbak  
lisu gozo aoz,  
griña ta amurrua  
besterik ez gogoz.
- 5 Zapalduko gaituez  
guzur ta indarrez,  
baiña egi garbi ta  
errazoietan ez.  
Nai bizi zapaldurik,  
nai bizi negarrez,  
guzurrik ez dogu nai  
egiaren orde.
- 6 Parlamentura joan  
errien ordeko,  
erri-eskubideak  
argitaratzeko.  
Amurrua dauken lez  
errazoienezako,  
arranoai ordaindu  
usoak ilteko.
- 7 Munduko denporea  
oso dogu labur,  
etorri eta bizi  
ta urteera ur.  
Baiña garbi jokatu  
ta ez izan bildur,  
bestera joatean  
mundu oni agur.

- 8 Munduan agintari  
gaur daukaguzanak,  
erdiak edo geio  
ez dira zuzenak.  
Eta zuzentasunik  
ez badau gizonak,  
ezer ez dau balio  
gizonen izenak.
- 9 Munduan martxan dago,  
ez da geldituten,  
bere martxan bear da  
sartu eta urten.  
Ain dau martxa andia  
erreza da jausten,  
eutsi urteerea  
zutik egin daiten.
- 10 Abereen alturan  
gizonak bagengoz,  
amurruz dan mundu au  
zuzen zan oraingoz.  
Gizonak alkar ilten  
amurrutan gagoz,  
eskuz ezin egiña  
egiñikan gogoz.
- 11 Jesus bake santua  
emoten etorri,  
ta guk lepoa emon  
ta ukatu sarri.  
Bake benetakoa  
nai badogu alkarri,  
lenen norberarena  
biotzean jarri.



*Jesus Maria Leizaola eta neu.*

12 Mundu zero bitarte  
daukagu iluna,  
fedea da ilun au  
argitzen dauskuna.  
Bestaldean dagon lez  
betikotasuna,  
ilun ortan galtzen da  
federik eztuna.

13 Zarra eta gaztea  
egitean neurtu,  
munduak egiten dau  
erabagi artu.  
Gerorako aria  
ez daiten apurtu,  
gaztea aurreratzea  
ta zarra baztertu

14 Abertzale batzuna  
sinis ezin leike,  
aberriaren aurka  
dabiltza jo ta ke.  
Gure Sabino barriz  
emen balitzake,  
maketo kamuflauok  
kanpora ostike.

15 Ertzaiña sartu dabez  
Francoren mutillak,  
bai zuzendari eta  
guardia zibillak.  
Lengo tratua dauke  
gudari umillak:  
kartzelan sartu eta  
torturakin illak.

16 Eurak daukez pistola,  
kaiñoi eta fusil,  
ta gu euran menpean  
egon bear isil.  
Eta ez dagoana  
makur eta umil,  
kartzelan sartu edo  
tiro batekin il.

17 Non dira errazoiak  
ta eskubideak?  
Non dira maitasuna  
ta zuzenbideak?  
Non dira Jaungoikoak  
jarriko legeak?  
Zapaldu dituz indar  
biotzik gabeak.

18 Aita ezautu ez ta  
ama maitatu ez,  
ta gu eskolatzera  
bialtzen dituez.  
Eurak jarri agintzen  
polizi ta juez,  
ta esklaboak legez  
tratatzen gaituez.

19 Burrukan dabiz danak  
eskuma ta ezker,  
iñor ez dabil zuzen,  
danak dabiz oker.  
Aitu egin gaitezan  
andi eta txiker,  
ea zapaltzen dogun  
munduko Luziper.

- 20 Beterik pistola ta  
fusil metralleta,  
kanpotarrak jatorkuz  
amurruz beteta,  
gu zibilizatza  
pizti garala ta,  
umildutzen ez dana  
bota *plisti-plasta*.
- 21 Artu txakurak eta  
balakin fusilla,  
eizera joaten dira  
edozeren billa.  
Nai izan basurdea  
nai izan mutilla,  
ezer ikusten bada  
bertan dabe illa.
- 22 Juzgatutzen bagaituz  
gaiztoen indarrak,  
entzun bear kalumni  
ta errazoi txarrak.  
Orreik ez dauz biguntzen  
egien negarrak,  
biotzaren lekuan  
daukiez adarrak.
- 23 Munduan izan leiken  
epairik txarrena,  
amurruz jarritako  
maitik datorrena.  
Kristo jarri maian ta  
gorrotoz barrena,  
inpernuko epaia  
da juez orrena.

- 24 Iñok egin al badau  
bere erri-kalte,  
bera ipinten dabe  
erriko alkate,  
bere jaioterra  
ez dabena maite,  
nai erria ondatu  
ta naigabez bete.
- 25 Millaren guzurra ta  
baten errazoia,  
egia bildotsa ta  
guzurra leoia.  
Gaiztoaren ezpata,  
zintzoen otoia,  
bildotsaren negarra,  
piztien orroia.
- 26 Indar asko daukan lez  
deabru zantarrak,  
biotzera sartzen dauz  
bere erpa txarrak.  
Bizirik dagozan lez  
asko lengotarrak,  
entzun bear kalumni  
ta errazoi txarrak.
- 27 Erri geiena preso,  
samin eta neke,  
Euskadi zuzentzeko  
madriltarraie eske.  
Eta eurari saldu,  
baita oso merke,  
traiziñoen artutako  
poltronaren truke.



- 28 Iñoren lan garbia  
txartzat artu daiten,  
beti kalumni eta  
guzurrak esaten.  
Balioko gauzarik  
ez dabe egiten,  
olakoak obeto  
asto-korta baten.
- 29 Gaizki esanak asko  
bat desondratzeko,  
zoritzarrez gaur dago  
ainbat orrelako.  
Baiña erriak ez dau  
egin zirkin asko,  
esaten daben dana  
guzurra dalako.
- 30 Gizona munduratu  
Jaunak bialduta,  
bere eskubideak  
zerutik artuta.  
Etorreran txiroa  
jarri arrituta:  
dana atrapatuta,  
dana zarratuta.
- 31 Luzifer deabrua  
iñok ezin ezi,  
infernura jaurti ta  
mundura igesi.  
Ta munduan jarririk  
mundutarren nausi,  
Kristo etorri zanean  
kurutzean josi.

32 Kain izan zanetik  
gabiz alkar ilten,  
eriotza besterik  
ez dogu ikusten.  
Alkartzen ez bagara  
errazoiz mai baten,  
tiroka gerrarikan  
ez da amaituten.

# Gizon jator bi

---

*Muxikan, Aita Santi Onaindia eta Alfontso Irigoienen omenaldian:*

Gure bertsoa zegoanean  
zulo sakon ilunean,  
gizon jator bi jazo zirean  
argitaratzen lanean.  
Eurai eskerrak indar barriztu  
egin da zorionean,  
gizon bi oneik pozez daukaguz  
eurantzako omenean,  
langille danak pozten diran lez  
frutua datorrenean.

Esaten dabe bertsolariak  
dirala berez sortuak,  
baita nik diñot asko ta asko  
zeuoi esker itxartuak.  
Bultzakadarik onenak ziran  
zeuokandikan artuak,  
bertsolaritzak gaur egun daukaz  
gorengo maillak lortuak,  
mailla au baiño gorago dira  
zuen bion merituak.

*Donostiako omenaldian:*

Bertsolariok geure arloan  
bai badaukagu ainbat zor,  
baiña aurten be omentzen doguz  
famiako bi dotor,  
jakiturian andiak eta  
gizontasunean jator.  
Oneixek ziran nire aldian  
bertsolaritzaren motor,  
eta gaur beste danen ganetik  
eurak agurtzera nator.

*Bazkal ostean:*

Aita Santi ta Alfonso jauna  
dakaguz geure erdira,  
bertsolariok alkartu eta  
euran ingurumarira.  
Gure bertsoa bultzatu eben,  
jakitun jatorrak dira,  
eurari esker gure bertsoa  
ikusten dogu dizdira,  
nik ez dakit gaur zer izango zan  
eurok izan ez balira.

# Bilboko Kafe Antzokia

---

- 1 Bilbon daukagu leku eder bat,  
au da Kafe Antzokia,  
bertako eta datozenentzat  
alaia ta egokia.  
Ta nai dabenak iñon aurkitu  
atsedenezko tokia,  
antzoki ontan aurkituko dau  
Bilboko zero txikia.
  
- 2 Gure euskerak aldi gogorra  
igaro dausku benetan,  
baiña jausi zan euskaldun zintzo  
ta zaintzaille jatorretan.  
Eta bizia salbatu dausku  
zulo ta baserrietan,  
gaur zorionez iru eskola  
Kafe Antzokian bertan.
  
- 3 Oindo oraintsu izan genduan  
euskerea galazota,  
zulorik zulo ibili bear  
eriotzaz zigortuta.  
Gaur egin geinke alai indartsu  
irrintzi aundi bat bota,  
erria aske ez badogu be  
euskera salbau jaku ta.

# Arantzak

---

1 Sarri askotan arkitua naiz  
egi on au esan nairik,  
ta oraingoan ezin naiz egon  
egi on au esan barik,  
egi andi ta garbia da ta  
iñon badago egirik.  
Esaera da ez dagoala  
lorarik arantza barik,  
baiña, kristauak, gure arantzak  
iñoz ez dauka lorarik.

2 Zelan arraio egongo gara  
Espaiñakin alkartuta,  
espaiñatarrak gu euskaldunok  
armaren puntan gaituz ta?  
Aldi bat arte euki genduzan  
eskubideak kenduta,  
gizonak ditun eskubide ta  
errazoiak zapalduta,  
baiña alan be guk ez daukagu  
itxaropena galduta.

3 Iparragirrek bein kantau eban  
ia emonez negarrai,  
ikusirikan menpe zirala  
gure mendi eta zelai.  
Ipar alde ta ego aldeko  
anaiok, asabai jarrai,  
olan alperrik jarriko dauskuz  
orko muga eta ibai,  
ezin legikez banandu eta  
odolez diranak anai.

4 Gizonak ezin agindu dau ta  
bere eskubideetan,  
kanpotarra da geuri agintzen  
geure erri ontan bertan.  
Eun ta berrogei ta amar urte  
gabilta burruka ortan,  
eta gaur bere anai-arrebak  
erbeste ta kartzeletan,  
oba burruka garbi baten il  
orrela izatekotan.

5 Gaur Espaiñan dan demokrazia  
oso dogu itxusia,  
guzur biurtu gura dauskue  
geure begiz ikusia.  
Gure errira bialtzen dausku  
zizaiña eta sasia,  
bertan doguzan lora lirañai  
aizkora ta artazia,  
Jesus Jainkoak esan daijala  
au bada demokrazia.

6 Mindurik danak sarri askotan  
gauza txarra egiten du:  
lagur urkoa iltearekin  
gure Jainkoa iraindu,  
eta gaiñera beraz batera  
bere erria samindu,  
emazteari senarra eta  
umetxoai aita kendu,  
Kainek egin ebana bere  
augaz ezin lei bardindu.

7 Jatorrizkoak diran ezker  
munduak ditun legeak,  
gizonik eta argienak be  
ezin leiz jarri obeak.  
Argi ta garbi ikusten dira  
ta gaiñera dotoreak.  
baiña barriak jarri dabez ta  
ministro ta erregeak,  
aberatsentzat oso on-onak  
eta or konpon pobreak.

8 Gu euskaldunok borrokan gabiz  
urteak gau eta egun,  
eta Madrillek jakin daijala  
zergaitik egiten dogun.  
Errespeto ta demokrazian  
gu gara guztien lagun,  
indartsu dabiz engaiñuakin  
guzurra sinistu daigun,  
biotz bakoak dira asko ta  
ezin izan biotz bigun.



- 9 Parabola lez artuta bere  
bat jo egin lei bildurak,  
gure inguru dagozalako  
saltzailleak ta lapurrak.  
Gure erriak bai artu dituz  
makurkeri ta zigorrak,  
Euskal Erriko bildots oneri  
urrua dautsez azurrak,  
amurrutuak ete dira ba  
gure auzoko txakurrak?
- 10 Aldi aretan egiñak ziran  
gaiztakeriz egiñalak,  
paliopetik Kristo kendu ta  
bertan jarri jeneralak.  
Ta palioa eroateko  
obispo ta kardenalak,  
kriminalari gorazarreak  
ta Kristori funeralak,  
santuak kendu altaratik ta  
bertan jarri kriminalak.
- 11 Espaiñatarrak gutzako dira  
engaiñosoak gaur arte,  
ta engaiñuok izanak doguz  
beti geure erri kalte.  
Geure erriko kaxak utsitu  
ta Madrillekoak bete,  
gauz onik iñoz ez dagoan lez  
tranposoarekin naste,  
orrelakorik ez dogu bear  
geure errepresentante.

12 Gure erria zuzenduteko  
bai dau argia Euskadik,  
ta itxartuta gogoan artu  
ez dakigunak oraindik,  
gauza onikan ez datorrela  
inoz kanpotarrakandik.  
Begira or zer agertzen dauskun  
igaroko bi gizaldik,  
engaiñua ta nekea baiño  
ez dala artu Madrildik.

13 Eskubideak zaintzeagaitik  
izan giñan zigortuak,  
zoritxarrean gaur be badira  
era ortako tratuak.  
Ta esan leike eurak dirala  
lengoagandik sortuak,  
beste era batera esanda  
lengo ortatik artuak,  
esandakoak ez badira be  
bai lengo aparatuak.

14 Munduan dira gizon batzuek  
amurruakin aziak,  
augaitik sarri dau arriskua  
gizon ondrauan biziak.  
Sarri askotan ez dauka lanik  
juezaren justiziak,  
detenitu nai juzgatu nai il  
egiten dau poliziak,  
era ortako jokaera dau  
gaur dogun demokraziak.

- 15 Orain arteko istorietan  
jazotako bat sinistu:  
beti jazo zan batak bestea  
indarrakin menperatu,  
indartsuena agintzen jarri  
ta galtzaillea zigortu.  
Baiña gerrea amaitutean  
ondo ez badira aitu,  
tiroz amaitzat emondakorik  
oraindik ez da amaitu.
- 16 Euskal Errian egundo etzan  
leialtasuna besterik,  
baiña bein baten sartu jakuzan  
otsoak ardi jantzirik.  
Ordurartean etzan ezautu  
erri ontan traiziñorik,  
baiña otsoak ekarri eben  
gogo txarra igarririk,  
otso zar orreik aldendu arte  
emen ez dogu bakerik.
- 17 Erbestetarrak sartu jakuzan  
euskaldunari etxean,  
gure kultura, nortasuna ta  
askatasuna kentzean.  
Arma zantarren indarren puruz  
artuak giñan menpean,  
eta zinismoz orain diñosku  
ez gagozala bakean,  
bakerik iñok ez dau emoten  
menpean dagon artean.

18 Madril zaleok agertzen dira  
kuku zarraren antzeko,  
boto denboran dira lagunak  
eta baita be etzeko,  
kuku zar ori etorten dan lez  
bere umea azteko.  
Gero or konpon gugaz aztuta  
Madrillen lau urterako,  
arloteok au egiten dabe  
geu leloak garalako.

19 Politikoak iskintzen dabe  
au ta ori aurrerantza,  
iskintzen dabe gero obeto  
biziteko esperantza.  
Batzuek alan, besteak olan,  
beste batzuk besterantza,  
baiña batek be ez dau emoten  
esanaren segurantza,  
askok ta askok agertzen dabe  
komediantearen antza

20 Amatxo baten seme izanda  
geu ezin gara konpondu,  
au ikusirik gure etsaiak  
barre lasai egiten du.  
Egiten dogu geu argaldu ta  
geure etsaia gizendu,  
anai bakotxak egin dagigun  
bakotxak geurea zaindu,  
eta otsoa datorrenean  
danok alkarri lagundu.

21 Gizona sortua da munduan  
askatua izan daiten,  
baiña gizonak euran artean  
dabiltza alkar lotuten,  
ta orregaitik gaur ez da errez  
mundua ona izaten,  
Euskaldunokin jazoten dana  
emen dago begi-bisten;  
txartzat gaituez bakean eurak  
ez dauskulako itxiten.

22 Gure Jainkoak egi zuzenai  
emon dautso milla grazi,  
orregaitiño guzur zantarrak  
egirik ezin ikusi.  
Orrela nai da menperatuta  
zigor gogorrakin esi,  
baiña egiak guzur orreri  
nai dautso adierazi  
guzurrarekin bizitzekotan  
oba dogula ez bizi.

# Urkiolan

---

**A**RRATIAKO erri guztiak egiten dabe urtero erro-meria Urkiolako San Antoniora, eta ogetamar urte edo geiagotan urte guztietan egon naz bertako mezan bertso kantari.

Urtero sortzen ziran barriak bitarte izaten zirala, normalean kantatzen nebazan egunari egokienak; eta oneik dira gorde dodazanak, eurak esan daberen mezaren ataletan kantatuak.

*Ikusten duzu goizean doiñuan lenengo irurak:*

- 1 Euskal Erriko lurrean,  
Urkiola gallurrean,  
fedearen izarrean;  
Arratiako erri guztiok  
urteroko batzarrean,  
geure oitura zarrean,  
fedea jarri indarrean,  
San Antonioren aurrean.
  
- 2 Ze gauza miragarria  
eguzkiaren argia  
zeru goitik etorria!  
Eta berakin etorten jaku  
gure frutu ugaria.  
Zeruko Aita guria,  
artu gure oparia:  
ardaoa eta ogia.

- 3 Abadea zuzendari,  
gu jarraituten berari,  
San Antonio zaindari,  
berotasunez jarraitu eta  
gurasoen fedeari,  
egin dagigun opari,  
aurrerantzako eskari  
lortzeko frutu ugari.
- 4 Otoi ederra egiten dana  
Jauna gogoan artuta,  
eta batez be egin ezker  
erri danak alkartuta.  
Batasunean alai,  
maitasunean anai,  
biotz danak zabaldua,  
gure Jainkoak erri guztiak  
alkarturik nai dituz ta.
- 5 Zentzunik bada onena dogu  
Jaungoikoaren legea,  
au ausnartzeko gauza ederra  
itxaropen ta fedea.  
San Antonio euskaldunentzat  
birtuteen erregea,  
bere laguntzaz indartu daigun  
bertan bakotzak berea,  
danok alkarrik gogoz eskertu  
grazi onen mesedea.
- 6 San Antonio, mundu onetan  
zure lagun zendun Jesus,  
Urkiolatik be igaro ziñan  
jarraitzean bere pausuz,  
gure lurreko abere eta  
frutu danak bedeinkatuz,  
santu andien birtute eta  
altasun andiak dozuz,  
zeure aurrean gagozan danok  
arren bedeinkatu gaitzuz.

7 Egunsentian entzun dira gaur  
Anbotoko deiadarrak,  
ta dei ortara aditu gara  
itxarrik arratiarrak.  
Gure bidea argitu dausku  
Urkiolako izarrak,  
San Antonion alkartu gara  
sendotzen oitura zarrak,  
gu ez gaitu, ez, bape bildurtu  
euri ta denpora txarrak.

8 Gure asabak ipar-izarra  
izan eben Urkiola,  
euran frutuen konfiantzako  
San Antonio eukela.  
Arratiarrok jokatu daigun  
gure asabak bezela,  
oraindiño be pizturik da ta  
Urkiolako kandela,  
eta mundua mundu dan arte  
pizturik iraun daiela.

9 Gaur Urkiolan gagozan danok  
ekarri geure gogora,  
sarri askotan gu gabizala  
zuzenbidetik albora,  
ez dakigula nondik gatozen,  
non gagozan ta ez nora.  
Zuzenbidera jarraitutzeko  
begiratu daigun gora,  
abisu onek iraun daiala  
urrengotik urrengora.



- 10 Goian daukagu elmuga eta  
begira daigun gorantza,  
gora begira dogu baita be  
gure bideko orratza.  
Ta izar orrek giatu gaituz  
gaur San Antoniorantza,  
bere laguntzaz sendotu daigun  
fedea ta esperantza,  
ortik dator ta betikotasun  
alaia ta aberatsa.
- 11 Gaurko mundu au aurkitzen jaku  
laiño baltzez estalduta,  
eta gizonak euran azpian  
euran iparra galduta.  
Arratiarrok jokatu daigun  
erri danok alkartuta,  
oitura on ta San Antonio  
gure gidari artuta,  
oitura onak zaintzen dituan  
erria salbauko da ta.
- 12 Meza eder bat ospatu dogu  
esku emonez alkarri,  
era ontako egun ederrak  
bear gendukez guk sarri.  
Egun oso bat iskinduteko  
gure San Antoniori,  
arrastia be eguna da ta  
arrastian be etorri.
- 13 San Antonion igaro dogu  
egun andi bat alkarrik,  
eta egun au ez deila izan  
gure bizitzan alperrik.  
Mundu ontako gure bidea  
dagon lez trabaz beterik,  
estualdi ta une larrian  
ez gaitzuz itxi bakarrik.

- 14 Euskal Erriko esaera bat  
dogu: "Euskaldun fededun",  
ta fede biziz alkartzen gara  
arratiarrok gaur egun.  
San Antonio santu andia,  
izan zaitez gure lagun,  
gure asaben esaera au  
egiz konfirmatu daigun.
- 15 Zeruko Aita, gaur artu dogu  
zeugandik egun barria,  
eta berakin eguneroko  
argia ta janaria.  
Geuk be iskindu nai dogu Zeuri  
geure frutu ugaria,  
San Antonio bitarte dala  
artu gure oparia.
- 16 Gaurko mundua igaroten da  
benetako aldi txarra,  
baiña oraindik pizturik dogu  
Urkiolako izarra.  
Ta bera dan lez argituteko  
daukagun bide bakarra,  
anaitzekoa izan daitela  
gaur egin dogun batzarra.
- 17 Mundu onetan doguz egunak  
bai era askotakoak,  
baiña benetan beti alaiak  
gure Urkiolakoak.  
San Antoniok emon daizkula  
emen eskatutakoak,  
era berean egun eder bat  
danontzako Jaungoikoak.

*1997-an, San Antonio ta bere eliza barriztuta  
ikusiaz:*

17 Gaur emen garan geientxoenok  
gagoz pozez arrituta,  
ikusirikan San Antonio  
ta eliza barriztuta.  
Zorionean bat edo beste  
bai da or arduratuta,  
arlo ortako lanen ardura  
guztiorena dogu ta,  
guztiok parte artu dagigun  
limosnakin lagunduta.

# Gudari zarrak

---

1 Gaur gobernuak diru-kontuan  
darabil ainbat zarata,  
erria ondo zuzenduteko  
dirua bear dala ta.  
Alan beaztu egiten jake  
gudari zarren soldata,  
aspaldin egin bear zan ori  
ez da oraindik bete ta,  
gudari zarrai emon saria  
ori justizia da ta.

2 Gazteok jakin gudariaren  
izena nondik datorren,  
asko dagoz ta ez direanak  
badirala esan arren.  
Gudari giñan gudari zarrak  
zuek sinistu ez arren,  
baita gaur bere bizi garanok  
atzean gagoz gogorren,  
atze aldeak eutsi dagion  
aurreak uts egin arren.

3 Gure erria gaur be loturik  
emen ikusten dogu ta,  
gazte maiteok, au esan zeinke:  
zagozela aspertuta,  
guk asko egin gendula baiña  
ez garala askatuta.  
Guk al genduna egin gendun da  
guri errurik ez bota,  
al dan guztia egin ezkerro  
dana eginda dago ta.

4 Gudari zarrak gaur auxe diño  
gudari gazteentzako:  
orain arteko gerra guztiak  
izan dirala galtzeko.  
Beste bide bat artu bear da  
oraindik aurrerantzako,  
lan asko egin atomikazko  
bonbaren bat egiteko,  
bada gaur dogun borroka onek  
irteerarik ez dauko.

5 Erria zaintzen jagi gintzazan  
eskuan armak arturik,  
eta augaitik jarri genduan  
mundu dana arriturik.  
Gaur be gudari zarren odolak  
ez dausku galdu berorik,  
baiña gaur egin bearko balitz  
biotza zabal-zabalik,  
Batzokietan dagozan askok  
ez dauke eusko odolik.

6 Igaro gendun gerran jarri zan  
mundu dana arriturik,  
iru nazioi eutsiagaitik  
larogei milla gudarik,  
eta augaitik larri gengoan  
danok eskomulgaturik.  
Jakin daiela munduan diran  
obispo ta agintarik,  
guri bakean ixten dauskunak  
gugaz ez dauka gerrarik.

7 Gaurko gudari gazte maiteok,  
au eidazue aditu:  
gure erriak iraun dagian  
indar danak bear ditu.  
Gudari zarrok geure aldian  
ezer ez geuntsan ukatu,  
gendun guztia iskindu geuntsan  
naita bizia jokatu,  
ta laguntzarik bear badozue  
gudari zarrai eskatu.

# San Juanetan

---

## *Bezperan:*

Arrokerizko jolas oietan  
dabiz milloiak erretan,  
eta gizonak goseak ilten  
munduaren bazterretan.  
Aberastasunik andiena  
dalako esku txarretan,  
mamarro gaizto guztiak erre  
gaur gabeko sugarretan.

## *San Juan egunean:*

Kristaurentzat meza santua  
otoirik ta ederrena,  
bere barruan gogoratuaz  
egun berak dakarrena.  
Egun danetan doguz santuak  
ta gaur dogu San Juanena,  
meza onetan egin daiogun  
santu oneri omena,  
meza dalako danen ganetik  
omenik eta onena.

Arrokeri dun agintariak  
anbat gauza txar egin du,  
berak eiteko adorerik ez,  
bere morroiai agindu,  
eta morroiak obeitzearren  
joan da samea kendu.  
Mundu onetan aldi ontan be  
baida olako durundu,  
Jaungoiko ona, agintariok  
argitu ta zentzundundu.



# Zeanuriko ermitetan

---

**Z**EANURIKO Andra Mari parrokiaren ondoan ermita txiki bat dogu San Balentin izenarekin. Santu au aiztuta egon zan urte-mordoan. Baiña ermita ori barriztu eta ondo atondu zanean, inauguraziño-egunean bertso asko kantatu genduzan Joxe Mari Artetxek eta biok, eta oietariko batzuk onako oneek, nik kantatuak:

Enamorauen santua dala  
geienok badakizue,  
alantxe da ta eztakianak  
artu nire abisue.  
Enamorauak artutzen dabe  
bata besteen mosue,  
emen ez dogu mosurik baiña  
badaukagu armozue.

Gure santu au aldi batean  
apur bat egin zan aiztu,  
ta zorionez bere auzoak  
barriz egin dabe piztu;  
eta gaur bere bere lagunak  
ein dabe asmo au artu,  
gauza ederra da ori eta  
bertatik gogoz jarraitu.

*Altzusten, San Migeletan:*

Gure Altzusten San Migel dogu  
gure Zaindari arturik,  
eta gaur bera aintzatuteko  
emen gagoz alkarturik,  
abade jauna aurre dogula  
biotz danak zabaldurik;  
Jainkoarentzat gizonak ez dau  
ori obetutzekorik.

Danok dakigu asko edo gitxi  
Mikel Deunan istoria,  
bera izan zala Jaungoikoaren  
aurrenengo gudaria.  
Gaur bere eguna dogu eta  
ein daiogun oparia,  
berau dalako gau eta egun  
Altzustarren Zaindaria.

Autortzen dogu jai nagusi au  
dala umil ta apala,  
emen eztago organu andi,  
bonbo eta astrapala.  
Baiña bai dago gauz ederrena:  
biotz andi ta zabala;  
gure Mikelek au ondo daki:  
obeagorik eztala.

*Undurragan, San Pedrotan:*

Egun barri bat ekarri dausku  
zeruetako argiak,  
eta lenengo Jaungoikoari  
geure esker ugariak.  
Izan zaiteze meza ontara  
danok ongi etorriak,

gure zorionak artu daizala  
don Pedro agurgarriak,  
eta bedeinka gaitzala danok  
gaur San Pedro zaindariak.

Gure San Pedro aintzatu daigun  
gaur dan lez bere eguna,  
mundu onetan kristau guztiok  
alai ospatzen doguna.  
Santu odoltsu, santu gogorra  
ta santu biotz biguna,  
uts bat ein arren gure Jesusen  
konfiantzazko laguna.

*Ipiñen, Santiagotan:*

Ipiñe aldeko auzounea  
Zeanuriko partean,  
Gorbei mendiko egalean ta  
solo ta baso artean.  
Gaur Santiago ospatutzen da,  
baita urtean-urtean,  
lan eta neke izan arren be  
jaitik jaira bitartean,  
jaiak ospatzen badakizue  
beste batzuek bestean.

Gorbei ganean kurutz santua  
ta Ipiñen Santiago,  
basa-elizatxo batean baiño  
danak baiño andiago,  
Konpostelako jai zaratatsu  
andiak baiño gorago.  
Esakereak auxe diño ta  
neu bere orretan nago:  
Jainkoarentzat anditasuna  
umiltasunean dago.

# Ausnarketan

---

1 Mendi altutik begiratuta  
azkenik ez da ikusten,  
gizonarentzat ez da erreza  
gauza ori ausnartuten.  
Zeruko Aitak bere altasunak  
olan dauskuz erakusten,  
augaitik nago auxe bertso au  
indartsuen abestuten,  
Jaungoikoaren anditasuna  
aintzatua izan daiten.

2 Jesukristoren dotriña dana  
oiñarritzen da pobrezan,  
ta aberatsak ostu dauskue,  
au ez dago zertan esan.  
Printzesa baten ezkontza ori  
pobreena etzan izan,  
erratu orreik gaur be badira  
ikusten dan lez Elizan,  
Elizarentzat askozaz obe  
kanpoan ezkondu bazan.

- 3 Munduan diran legeak dira  
gizonak jarritakoak,  
eta ez dira erdiak bere  
Jainkoaren gogokoak.  
Geienak dira aberats eta  
andiaren aldekoak,  
mundu ontarako jarri zituan  
argienak Jaungoikoak,  
zuzenak eta errezak eta  
iñon atxaki bakoak.
- 4 Aberatsak dau kristau txiroa  
indarrez menperatute,  
ta ori barriz Kriston aurrean  
santu bat lez agertute.  
Kanpo santuan bere illetxez  
leku onenak artute,  
il da gero be ez badabe nai  
txiroarekin alkarte,  
illetxe orreik ein daiezala  
kanpo santutik aparte.
- 5 Atzo bardiñak, gaur ez bardiñak,  
bier barriro bardiñak,  
andi ta txiki, txiro, aberats,  
zuri, gorri ta urdiñak.  
Kanpo santura bakarrik doaz  
gizonaren gorputzkiñak,  
galtzuak dira kanpo santuan  
eiten diran alegiñak,  
bakarrik dira baliosoak  
munduan ondo egiñak.

6 Kanpo santuan ikusten dira  
arri landu ta burdiñak,  
artista onak asko kostata  
aberatsentzat egiñak.  
Antxe be ondo igaroteko  
eiten dabez alegiñak,  
eta txiroa irunsi bear  
bere lur santu gordiñak,  
ez ikaratu, ara joatean  
guztiok gara bardiñak.

7 Mundu ontara gatoz guztiok  
enkargutxo bat arturik,  
egin bearrik ez dogu geio  
berau entregau besterik.  
Baiña bidea aurkitzen dogu  
tentazioaz beterik,  
zuzen ta zintzo jokatu bear  
uts orretan jausi barik,  
azken arnasan entregatzeko  
enkargu ori osorik.

8 Esaten dabe Kristo dogula  
errege danen Errege,  
baiña erregeok nitzat ez dira  
Kristogaz aitzatzeko be.  
Mundu ontako errege dana  
gizonak autaten dabe,  
eskubideak artzen badauz be  
goiko altasunik gabe;  
baiña Kristo da zeru ta lur ta  
altasun guztien jabe.

- 9 Anaiak gara lapurditarrak,  
Zuberoa ta naparrak,  
anaiak baita gipuzkoar ta,  
arabar ta bizkaitarrak.  
Guztion Ama Euskadi da ta  
gu bere seme bakarrak,  
naita mapatik borrau nai izan  
kanpoko indar zantarrak,  
naita banandu gu beti gara  
Euskadi erri bakar bat.
- 10 Espain ta Prantzi dira otso lez,  
Euskal Erria bildotsa,  
eta otsoak bildotsai beti  
nai dautsie eriotza,  
kendu nai dautse bere kultura,  
nortasuna ta izkuntza.  
Odol zaleak alkar tiraka  
zatitu dautse gorputza,  
baiña gorputza zatituta be  
osorik dauko biotza.
- 11 Gure erria bizirik dago,  
indartsu arnas, irrintzi,  
Pirineoak erdi dirala  
emen gagoz sei probintzi,  
mundua mundu izango dan arte  
naita narrua erantzi.  
Alde batetik Espaiña da  
eta bestetikan Prantzi,  
otso bi oneik aoan dauke  
baiña ezin dabe iruntsi.

12 Gure erria benetan dogu  
naturalezaz apaiña,  
zori txarrean urte gutxitan  
sartu da zerbait zizaiña.  
Baiña ondatu geinke gatx ori  
gaur indartsu dago baiña,  
garbizaleok artu dagigun  
atxurra eta kodaiña,  
zuzterretikan atera daigun  
ta erein lora liraiña.

13 Gaur erdeldunak ipini jakuz  
euskerearen zaindari,  
oillategian oilloak zaintzen  
txakur eta azegari,  
ardao zale ta erdi mozkorra  
tabernako tabernari.  
Guzur-itxura badauko bere  
or dagoz iru mirari,  
Nobel saria emon bearko  
ori lortzen dabenari.

14 Sarri entzun da gure Adanen  
izkuntza euskera zala,  
ordutik ona iraundutea  
ez da meritu makala.  
Or ikusten da argi ta garbi  
izkuntza onen itzala,  
ez dot esango orren jauberik  
bertsolariok garala,  
baiña bai bertsoa kantatzean  
euskera egiten dala.



15 Gure euskerak igaro dituz  
benetan aldi larriak,  
baiña alan be ez dituz galdu  
iñoz bere oiñarriak.  
Urietatik ondatu arren  
zaindu eban baserriak,  
gaur urian be euskeraz doguz  
umetxo agurgarriak,  
eta frutua emango al dau  
gaur dogun lora barriak.

# Umezurtzak lez

---

**Z**EANURIN parroko egon zanean don Martin Olazar abadea, zigortu eta kartzeleratu eben urtean, Andra Mari egunez meza nagusian kantatutako bi:

Meza onetan umezurtzak lez  
aurkituten gara baiña  
Andra Maria lagun dogula  
lor্তু da meza bikaiña.  
Gure Amatxo agertzen jaku  
loratsu eta liraiña,  
agintariak ez dira etorri  
ta preso eliz-artzaiña,  
eurakana be eldu daitela  
intzentso onen usaiña.

Gizonak ez dau bizi gura-ta  
anaiarekin bakean,  
gorrotoaren frutua dogu  
mundu guztien kaltean,  
ta guztia da daukagulako  
deabrua bitartean.  
Andra Maria, ez jausiteko  
deabruaren erpean,  
oilla lokeak bere txitak lez  
gorde gaitzuz magalpean.

Egun aretan kantatua da au be:

Fusilatuak izan ziranen  
a azken ordu larria!  
Zintzo ziranak sentitu eben  
justizien egarria,  
ta asetzeko bala-zuloko  
odolezko iturria.  
Odol sakraua isuri zana,  
baiña badator barria,  
naita erriko gizon danak il  
ez dabe ilgo erria.

# Gabonetan

---

- 1 Askatzaillea etorri zandik  
urteak igaro dira,  
askatasun au ez da zabaldu  
oraindik mundu guztira.  
Gabon jaietan izar bat dogu  
Belen aldean dizdira,  
bere argia eldu daitela  
baita be gure errira.
  
- 2 Jaunan legeak beera eta  
gizonak jarriak gora,  
guzurra dago lege barruan,  
egia legez kanpora.  
Era orretan dago munduan  
gaurko gizonen ganora,  
egiarekin ezin mogitu,  
guzurrarekin nainora.
  
- 3 Mundu onetan iñok nai badau  
bide argi ta zuzena,  
duda izperrik iñon ez dago,  
ori dogu Jesusena.  
Baiña nai eta ondo azaldu  
bere lege ta izena,  
diñoenak be ez dau betetzen,  
orrek emoten dau pena.

- 4 Andia dogu bakeen alde  
askoren itxaropena,  
baiña au lortu leukienak ez,  
or sartzen jaku eztena.  
Bakeen alde ez badaukagu  
bakea lortu leikena,  
egunen baten etorri leike  
ortik gizonen azkena.
- 5 Poztu gaitezen egon giñanok  
goiko itxaropenean,  
itxaron gendun izar argi au  
argiz agertu danean.  
Izar eder au agertu jaku  
Belengo zero ganean,  
egien alde zeñek itz egin  
sortu da zorionean.
- 6 Gabon jaietan mundu guztia  
egiten jaku alaitu,  
askatzaileak gizon guztiok  
nai gaitulako askatu.  
Ez daigun egin askatasun au  
bier etzirako aztu,  
egun alaiok egin daiguzan  
beti-betiko luzatu.
- 7 Erodes orrek ikusi nai zun  
Ume Jesusen odola,  
baiña zerutik etorri jakon  
aingeru ume-jagola.  
Eta Erodes esku igurtzen  
putzez beterik zegola,  
Ejitorantza iges eginda  
ezin atrapau iñola.

- 8 Kale guztiak argitan dagoz,  
Gabon dala da ezagun,  
baiña ez dakit misterio au  
sinistu leiken gaur egun.  
Kale guztiak argitan baiña  
barruak daukaguz ilun,  
eta lenengo geure argia  
bakoitzak ixitu daigun.
- 9 Zergaitik negar, ainbeste negar?  
Zergaitik negarrez urtu?  
Belen aldeko zeru ganean  
izar bat jaku agertu.  
Ta izar orrek gaba ilun au  
egiten dausku argitu,  
bakea eta poza nai dunak  
izar orreri jarraitu.
- 10 Egun onetan lagunentzako  
auxe gura dot eskatu:  
Ume Jesusek egin gaizala  
askatu eta alaitu.  
Bere inguru danok jarrita  
askatasuna abestu,  
eta kopea gora jasota  
lagunak gogoan artu.
- 11 Zeruko Aitak ikusirikan  
gizon guztiok ain naspil,  
gu zuzentzeko Jesus bialdu  
maitasunez eta umil.  
Zeruko uso bakezale au  
gure buru gane dabil,  
Barri Onaren ekarle da ta  
tiroz guk ez dagigun il.

- 12 Zeruetara pasadizuan  
mundu onetara sartu,  
eta Jesusek ipini euskun  
zein bidetatik jarraitu.  
Berea dogu bide bakarra  
eta beste bat ez artu,  
ara ez dago beste biderik  
eta ez daigun erratu.
- 13 Gabon-jaietan urte zarra il  
eta jaio urte barri,  
urte barri au izan daitela  
guztioentzat ongarri.  
Diñogun legez egiz bagara  
zorionaren egarri,  
maitasunezko besarkada bat  
emon daiogun alkarri.

# Jesus etorri jakun

---

- 1 Jesus etorri jakun  
danok askatzeko,  
Gabon ospatzen dogu  
au gogoratzeko.  
Baiña urte danetan  
au jazoten jako:  
aurkitu artzain gitxi  
ta Erodes asko.
- 2 Munduan dabiltzanak,  
Jesus, zure pausuz,  
guzurrez epaituta  
kartzeletan dozuz.  
Gizonak askatzeko  
ordenak dakazuz,  
munduan egiteko  
naiko dogu Jesus.
- 3 Jesus Salbatzaillea  
munduratutean  
ostatu eske dabil  
atean-atean.  
Azkenez jaio bear  
estalpe batean,  
andirik andiena  
txikien artean.



- 4 Kristok ipini dausku  
bideko orratza,  
bere punta gidari  
jarririk gorantza;  
gero igon orduan  
munduko aldatza,  
aurkituko dogula  
Aitaren baratza.
- 5 Gizon danok zentzuna  
urri daukagun lez,  
jai oneik artzen doguz  
farraz eta burlez.  
Geu askatzen etorri  
Jesus maitasunez,  
ta gizonak berari  
ondo erantzun ez.
- 6 Etorri da Mesias  
egon giñana zain,  
Erodes be an zegon  
andiki ta apain.  
Jesusek susmaturik  
traiziñoen usain,  
naiago izan zitun  
abere ta artzain.
- 7 Gaur mundu au dogun lez  
amurruz beterik,  
amurrutik ez dator  
gerrea besterik.  
Ezelan be ez dago  
bakea lortzerik,  
geuk geugan ez badogu  
barruko bakerik.

- 8 Guziok dakiguna  
egi bat au dala:  
txarrak jaten dabela  
onak egin ala.  
Zintzo eroateko  
au arlo zabala,  
Espiritu Santuak  
argitu gaitzala.
- 9 Mundua askatu zan  
Jesus etortean,  
baiña etzan onartu  
arroen artean.  
Bi milla urte eta  
gizonak katean,  
ia apurtzen diran  
aurtengo urtean.
- 10 Ain zan indar andiko  
izarren argia,  
Erodesek eskindu  
bere jauregia.  
Jesusen erantzuna  
nitzat larregia,  
susmatu ebalako  
ume-iltegia.
- 11 Jesuseren bidea  
egin dogu artu,  
gura dogu bertatik  
adorez jarraitu.  
naita bide au izan  
gogor eta estu,  
Jaunaren baratzera  
eroango gaitu.

- 12 Urte guztietan lez  
emen dogu Gabon,  
bakezaleok alkar  
zorionak emon.  
Erodes be or dabil  
eta lo ez egon,  
begiratu zerura  
izarra non dagon.
- 13 Urtea joan eta  
urtea etorri,  
Gabon jaien barruan  
dogu Urte Barri.  
Diñogun lez bagara  
zorion-egarri,  
besarkada bat emon  
guztiok alkarri.
- 14 Zeru eder guztia  
dogu izarratu,  
Belenera doana  
zuzenbide artu.  
Ezkutatzen bajaku  
barriro biurtu,  
ta askatasunera  
zuzenduko gaitu.
- 15 Etorri da Mesias  
guztion artera,  
mundua askatu ta  
danok salbatzera.  
Jokatuten badogu  
beraren antzera,  
salbatuko gara, bai,  
beragaz batera.

16 Belen ganean dogu  
dizdira izarra,  
borondate oneko  
gizonen iparra,  
biderako argia  
ta maitasun-garra,  
aldatza igoteko  
umillen indarra.

# Eskerrak

## Zeanuriko omenaldian

---

1 Gizona samur jartzen dauan lez  
era ontako egunak,  
eskerrik asko, antolatzaile  
ta bertsolari lagunak.  
Eskerrik asko, soñulari ta  
biotzeko euskaldunak;  
eskerrik asko etorri ez ta  
gogoz emen dagozanak,  
eskerrik asko guztiontzako  
gaur Basilio Pujanak.

2 Au lako egunak egiten dausku  
gizona oso samurtu,  
eta ez dakit nire bertsoa  
zelan asi ta amaitu.  
Zuek guztiok egin dozue  
borondatea agertu,  
nire aldetik be gura neuke  
zuek guztiok eskertu,  
biotza zabal-zabal dodala  
nire esker ona artu.

3 Umetxotatik ikasi neban  
Jesukristoren dotriña,  
eta berakin zerua dala  
gizonarentzat egiña.  
Andik etorri dala dirudi  
nik gaur dodan atsegiña;  
anai-arreba guztiok, jakin  
bestetik dodan samiña:  
orain zuekin daukadan zorra  
iñoz ordaindu eziña.

4 Bertsolariak kontauak giñan  
gu gazteak giñanean,  
ta bildur giñan zer izango zan  
gu isiltzen garanean.  
Baiña gazteak agertu jakuz  
arloan gogor lanean,  
indartu eta txukundu dabe  
bertsoa zorionean;  
eskerrik asko, gazte maiteok,  
erriaren izenean.

5 Bertsoagaitik idatzi leike  
orri zabal ta luzia,  
naita ez izan gure bertsoa  
liburutik ikasia.  
Bertsoak dauka danen ganetik  
bere berezko grazia,  
batzuk diñoe gaur dagoala  
politikara jausia,  
bertsoa ez da politikea,  
bertsoa da justizia.

6 Gaurko onetan antolatu da  
ain ikusgarrizko festa:  
agintariak, bertsolariak,  
radio ta telebista.  
Eta jai au da bertsolai zar bat  
dalako protagonista;  
gazte maiteok, ortik jarraitu  
biotzak gora jasota,  
bertsolaritza salbatzen bada  
erria salbauko da ta.

# Zeanuriko

## Andra Mari jaietan

---

1 Gaur Andra Mari agertzen jaku  
loratsu eta liraiña,  
zeruetara joan daitela  
loratxo orrein usaiña.  
Guretzako be gaur izango da  
txistua ta tanboliña,  
aingeruak be eukiko dabe  
jai gertatzen zer egiña,  
gaur igon da ta zeru ta mundu  
guztiaren Erregiña.


2 Beren santuak ospatzen dira  
bakotxaren auzunean,  
Andra Maria erri guztiak  
Andra Mari egunean;  
eta beraren egun andia  
gaur dogu zorionean,  
seme-alabak pozten diran lez  
amagaz dagozanean,  
egun andi au igaro daigun  
alai ta batasunean.



3 Edadez zerbait gora garanok  
begiratuta sinistu  
denporeagaz egun andi au  
egin jakula otzitu.  
Gogoratuta egin dagigun  
egun au indar-barriztu,  
Andra Maria Ama ona da,  
berari gogoz eskatu,  
eta fedea sendotuteko  
berak indartuko gaitu.

4 Urreko atxa alde batetik,  
bestetik Gorbei mendia,  
tontor bi onein erdian dogu  
Zeanuriko erria,  
eta eleiza nausi onetan  
erriaren Zaindaria,  
gu giatu ta zaintzen gaituen  
Ama dan Andra Maria;  
otoi ta jolas igaro daigun  
gaur bere egun andia.

5 Meza onetan, anai-arrebok,  
kantatu dogu alkarrik,  
Jesus bera be emen dogu ta  
ez gara egon bakarrik.  
Poz andiakin ikusten gaitu  
erri maite Zeanurik,  
era ontako egunarentzat  
iñon ez dan lez neurrik,  
egun andi au luzatu daigun  
betiko oso-osorik.



*Zeanuriko Andra Marin, meza barri baten bertsolari, Deunoro Sardui eta ni. Obispo bat be bazan an, Zeanuriko semea.*

6 Egun onetan ospatzen dogu  
Agoztuko Andra Mari,  
ta jai onetan beti izan da  
alaitasuna ugari,  
zerura igon eban eguna  
edur garbia lez zuri.  
Zeru zabalak alairik dagoz  
ta aingeruak kantari,  
Andra Maria errukiorra,  
zaindu zure Zeanuri.

7 Burrukari bi dagozanean  
deabrua da bitartean,  
deabru zarra barrezka eta  
besteak euran kaltean.  
Andra Maria, izan gaitez  
maitasunezko bakean,  
txitetxoak lez pillatu eta  
gorde gaitzuz magalpean,  
eta eriotzaren ondoan  
beti zurekin batean.

# Jesus Oleaga jaunari

---

**A**MIGOS *del País* izeneko alkarteak Jesus Oleaga jaunari egindako omenaldian, Zeanurin, 1995-ko irailaren 23-an:

1 Buru gora ta alai dogu gaur  
zure erri Zeanuri,  
goratzarre bat eiten jako ta  
gaur bere seme bateri.  
Inguru ontan alaitasuna  
besterik ez da agiri,  
ta orregaitik aстера noa  
neu bere bertso kantari,  
lora-txorta bat iskindu nairik,  
Jesus, zure omenari.

2 Zuk badakizu gu mutikotan  
eskola-lagun giñala,  
eta gutzako bizitza ontan  
egun onenak zirala.  
Gutzako ziran jolas alaiak,  
tronpa eta parrantola,  
esaten euskun eskolarako  
gogo asko ez geunkala,  
baiña nik diñot ume-denporan  
ume izan bear dala.

- 3 Bere garaia eldutakoan  
erri-eskola amaitu,  
andik aurrera gero bako txak  
al eban bidea artu,  
ta askok barriz nai izan gendun  
bidetik ezin jarraitu.  
Igarokoak igaro eta  
gaur barriz gara alkartu,  
eta munduan egin dozuna  
guztia maian agertu.
- 4 Aldi batean aurkitzen nintzan  
munduakin aspertuta,  
nire bidean gizon gizon bat  
iñon ezin aurkituta.  
Baiña bat beintzat aurkitu neban  
lagun Jesus ezaututa,  
ordutik ona aurkituten naz  
nire indar barriztuta,  
ta orregaitik kantatzen dausat  
nire txapela kenduta.
- 5 Mundu onetan bako txak dogu  
egin bear bat astuna:  
gizartearen alde egitea  
emen egin al doguna.  
Eta ori da zuk, lagun Jesus,  
gaur arte egin dozuna,  
Jaunari esker euki bere bai  
egiteko altasuna,  
altasun orri emon dautsazu  
benetako erantzuna.



*Neu eta Jesus Oleaga, nire ume-denborako laguna,  
onen omenaldian, Zeanurin, 1995-IX-23-an.*

6 Zeure bizitzan zuk egin dozu  
merkantzi txarrik ez saldu,  
egien alde jokatu eta  
itxaropenik ez galdu,  
guzur maltzurra aldendu eta  
egi garbia azaldu.  
Egia egi da beti eta  
naita guzurak zapaldu,  
mendia beti an dagoan lez  
naita laiñoak estaldu.

7 Oiñen gaiñean egoteko be  
ia enaz gauza baiña,  
etxat damutzen ona etorteko  
egin dodan alegiña.  
Gauz andia da sentitutea  
lagun baten atsegiña,  
Jesus, zeurekin alkartzen da gaur  
euskaldun talde apaiña,  
txalotu eta goratutzeko  
egin dozun lan bikaiña.

\* \* \*

Jesus Oleaga jaunari egiñiko omenaldiaren oroi-  
garri bezela, liburu polit bat atera eban *Amigos del*  
*País* alkarteak. Neri Rafael Ossa Etxaburu jaunak  
bialdu eustan, eta orduan beste bertso auek jarri  
nebazan:

8 Zuk bialduko liburutxo  
artu neban, Ossa jauna,  
nire bizitzan biotz barruan  
ondo gordeko dodana.  
Orrenbestean eskertuteko  
etzan izan nire lana,  
geure lagun bat aupatuteko  
izan zan egin nebana.

9 Zuek dozue izen ederra:  
*Amigos del País Vasco*,  
eundakak urte bizirik eta  
itxaropena geroko.  
Gaur arriskua dauko gizonak  
laiño artean galtzeko,  
seme leialak ditun erria  
egundo ez da galduko.



# Zeanuriko

## Txato aizkolariari

---

1 Neuk aldi atan kantau nebana  
estimauko'zue geien,  
gure Txatoa entrenatzen zan  
Undurragako zelaien,  
bere *fotina* egiten eban  
Aldaminen ta Gorbaien.  
Len esaten zan aizkolaririk  
ez egoala Bizkaien,  
gaur emen dogu gure Txatoa  
geiago esan ez daien.

2 Alde batetik arduraz eta  
bestetik pozez beterik,  
ikusten nago gaur justizia  
iñon bada justizirik,  
guzur maltzurra amaituten da  
ta justizia bizirik.  
Bere seme zan gizon bateri  
zor bat eutsan Zeanurik,  
ta zor andi au ordaindu nai dau  
erri dana alkarturik.

# ***Auspoaren auspoa*** **liburua**

---

- 1 *Auspoen auspo* sortu zala ta joan nintzan Donostira, umiltasuna egon bazan be guzti-guztia dizdira. Zorro utsean ez daiten jausi ara egin neban jira, bertsoz diñodaz bada guztiak aitatutekoak dira.
  
- 2 Euskerearen aurka izan da trikimailu martingala, zaintzailleak be agertu ziran ta bat zeu, aita Zabala. Ikusten dogu bertsoen alde egin dozun lan itzala, baita bertsoa salbau ezkerero euskera salbauko dala.
  
- 3 Zeure biotzak bultzatu eta auspo antzera aizetsu, autsan azpian zegon txingarra sugarretan jarri dozu. Gaur be *Auspoen auspo* egiten lanean zabiz jo ta su, auspoen auspo ta aize danen auspo be ez al zara zu?

- 4 Bertsolariak kantatukoak  
asko marabillak dira,  
gure bertsoa beti egon da  
bultzatzailleai begira.  
Ilunetan or zegon bertsoa  
atera dozu argira,  
eta gaiñera emon dautsazu  
urregorrien dizdira.
- 5 Bertso-arlo bat izan gendun lez  
aizetan gora joana,  
ta zeu zara bat aizerik aize  
billa ibili zarana.  
Billatu be bai asko ta asko  
or galdutzat izan zana,  
lan gogorretan ez da ausartzen  
amorerik ez daukana.
- 6 Idazlariai emoten dautsez  
lanagaitik iru lauko,  
beste inñondik ez balitz geio  
tintarentzako bez naiko.  
Ostantzean zuk ez dozu bear  
ezer biotzarentzako,  
bada biotzak sentimentuen  
berezko indarra dauko.
- 7 Fariseoa beti dogun lez  
arroputz eta abilla,  
bere atzean jartzen dau beti  
kementsua ta abilla.  
Baiña biotza ez dabilen lez  
oore ta txalo billa,  
mundua argi erabilteko  
ori dogu marabilla.

- 8 Zuk sortu zendun gure *Auspoa*  
txingarrai autsak kentzeko,  
baita be orain beste auspo bat  
putzari putz egiteko.  
Lan bikain ori izango dan lez  
istorietan betiko,  
erriak badau itxaropena  
izan zana izateko.
- 9 Arroputz batzuk agertzen dira  
eurak oore artzeko,  
zure arloko lanak olako  
elbururikan ez dauko.  
Zure muga da zeure lanakin  
besteena aupatzeko,  
eta guztia izan daitela  
erriaren onerako.
- 10 Euskeran alde lan egitea  
bein izan zan bide latza,  
alan da guztiz jorratu dozu  
gure euskaldun baratza.  
Zuk erriaren alde egiña  
da oso lan aberatsa,  
eta lan ori dogu benetan  
erriaren esperantza.
- 11 Zoritxarrean munduan dan lez  
asko itxua ta gorra,  
igaro dozun lanbide ori  
izan da oso gogorra.  
Gogorrak ez dauan lez bildurtzen  
egundo gizon jatorra,  
zeure kemenez lortua dozu  
elmuga zendun tontorra.

12 Munduan artzen ez dan saria  
artuko dan lez zeruan,  
zerbait murriztu egin leike au  
artu ezkeru munduan.  
Zeruetako sari bakar au  
artu bear dan orduan,  
zuri Jainkoak ez dautzu esango:  
"Munduan artu zenduan".

13 Atsegiñagaz ikusi eta  
bertan izan zan giroa,  
esan geinke, bai, salbatu dala  
gure erriaren geroa.  
Ondo ta zuzen bota dozu zuk  
zeure lanaren tiroa,  
bertso oneikin artu egizu  
Bizkaiko txalo beroa.

# Ama Euskerari

---

- 1 Niretzat izango litzakena  
benetan oso tristea:  
nire euskera maitean jaio  
eta erderan iltea.  
Ama Euskera, biotzez nai dot  
zure seme izatea,  
enaizu iñoz, ez, alderatu,  
Ama Euskera maitea.
  
- 2 Bertsolariok gogoan dogu  
euskera gaixo dagola,  
baiña erriak jakin daiala  
arduratuten garala.  
Eta diñogun au azaltzeko  
ez da errazoi makala,  
bertsotan egiten dan artean  
euskera egiten dala.
  
- 3 Gaur gazte askok egin dabena  
nai daberen bidea artu,  
esango neuke asko ta askok  
egin dabela erratu.  
Ba nai badogu bertso errikoi  
benetakoan jarraitu,  
lengo bertsoak jatorriz daukan  
ari ori ez apurtu.

4 Danon indarren bearrean da  
gure aberri laztana,  
ta geuk bakotxak egin dagigun  
bera zaintzeko al dana.  
Bertso kantari jarraitutea  
da bertsolarien lana,  
biotz barrura sartzen dalako  
bertsotan esaten dana.

5 Gaurko baserri asko baserri  
diranik ezin da esan,  
lau orma zarrak ikusirikan  
sasi eta euntzorritzan.  
Orixe jaunak esango eban:  
"Au baserri bat izan zan";  
eta nik diñot: "Baserri artan  
familiaritxo bat bizi zan".

6 Jesukristo be errubako zan,  
erru danak beretzako,  
euskerari be orren antzeko  
gauza bat jazotzen jako.  
Gure euskerak politikagaz  
zer ikusirik ez dauko,  
baiña beti da atxakiren bat  
errubakoa ilteko.

7 Arduradunak saiatzen dira  
euskerea il ez daiten,  
jo ta ke dabiz ikastoletan  
umetxoai irakasten.  
Baiña eskolan ikasi ori  
ez badabe erabilten,  
ikastolako ikaslek eurak  
itxiko dautsie ilten.

8 Erdeldun batzuk nai dabena da  
gauza itxusi tristea:  
gure euskeran jaio giñanok  
euran erderan iltea.  
Baiña au izango litzaken lez  
duin bere ez izatea,  
guztion arte zaindu dagigun  
gure euskera maitea.



# Illetak

---

*Edozein illetan:*

Eriotzeak ebagi eta  
gorpuztik arimak alde,  
gorputzarentzat ilunabarra,  
arimarentzat sorkalde.  
Fedean dogun aberastasun  
andienetaiko bat au de:  
Zeruko Aita egiten dala  
arima guztien jaube.

Samin ta negar itxi dau baiña  
agur ein daben etxean,  
atsegin be bai, Zeruko Aita,  
Zeugana zeruratzean.  
Lapraskadarik izan badau be  
mundu ontako aldatzean,  
Zeruko Aita, parkatu eta  
artu zeure baratzean.

*Zeanurin, Jose Mari Artetxe bertsolari eta laguna-  
ren illetak ospatu ziranear:*

Bai, Jose Mari, zu izan ziñan  
gizon oso-osokoa,  
gure erria aupatutean  
berba gozo-gozokoa.

Zutzat bakarrik izaten ziran  
erria ta Jaungoikoa,  
Alguztidunak emon daizula  
atseden on betikoa.

*Anton Landajuela, gudari zar trebea, tenientea,  
bizimodua ateratzeko euskal idazlea, Arratiakoa,  
bere illetan:*

Lagun zar Anton, gure agurra  
bertso batez abestute,  
zuk izan zendun trebetasunak  
benetan merezi dau te.  
Bizi guztia igaro zendun  
lan, kartzela ta gerrate,  
alan ta guztiz Jaungoikoaren  
borondate danak bete,  
Zeruko Aitak artu zaitzala  
eta agur, gero arte!

*Juan Ajuriagerraren illetan:*

Ai, bai, lagun Ion, zu izan ziñan  
benetako gudaria,  
zure zain dagoz gudari asko  
ta Agirre lendakaria.  
Uso antzera eroaiozue  
gure erriko barria:  
naita naigabe ugari izan  
bidi dogula erria.

*Jose Antonio Agirreren neskame izandako bati,  
beraren illetan:*

Munduko bizitzea  
igaro lotuta,  
baiña aberriari  
ondo serbituta.

Jaunak dauko zerua  
zuretzat gertuta,  
garbi jokatzearren  
merezi dozu ta.

*Lagun atzeratu baten illetan:*

Zeruetara pasadizoan  
gatoz mundu onetara,  
Jainkoarenak gara guztiok,  
bardiñak iñor ez gara.  
Zu, lagun zarra, igaro zara,  
bai, zeu be zeure erara,  
Jainkoarentzat beste guztien  
antzeko izango zara.

*Imanol Goikoetxea Luno-Bilbao adiskidea il zanean:*

Bai, zu, Imanol, lanean giñan  
arañegun alkarrekin,  
langille lagun bikaiña ziñan,  
zuk geiago ezin egin.  
Ixtripuz atzo il zareala  
larriz egin dogu jakin,  
zure taldea ez da aztuko  
egundo bere zurekin.

*Nire lagun baten loba baten illetan. ezbearrez  
amar urte eukazala il zanean:*

Zeruko Aita, orra doatzu  
sendi bateko kutuna,  
aingeruakin alai-alairik  
Zu aintzatuko zaituna.  
Iñola ez da beteko baiña  
emen itxi dun utsuna,  
baiña gogotsu iskintzen jatzu  
Zeuretzat bear dozuna.

Samin ta negar itxi dau baiña  
agur egin dun etxean,  
atsegin be bai, Zeruko Aita,  
Zeugana zeruratzean.  
Landaratxo au atera dozu  
mundu ontan loratzean,  
betiko frutu izan dagizun  
sartu zeure baratzean.

# Meza santuan

---

*Asieran:*

Eguzkiak lez urruturikan  
ekaitz gaizto eta laino,  
maitasunaren berotasunaz  
dator Jesus geuganaino.  
Onek diñosku Jaunan grazia  
badogula oraindiño,  
serbitzariak garan ezker  
zer era obe au baino,  
gure otoiak joan daitez  
zeru-goienetaraino?

Joko zikiñak ikusten dira  
zoritarrez gaur edonon,  
Jainkoari ta deabruari  
biei errazoia emon.  
Baiña Ebanjelio santuan  
zelan idatzita dagon?  
Jainkoakin ta deabruakin  
biekin ezin da egon.

Jaungoikoaren etxe santuan  
gaur egin gara alkartu,  
meza santu au asi aurreti  
egin gaitez an autortu.  
Geure arteko kezka guztiak  
bertan alkarri parkatu,

asmo sendo au ez dakarrena  
alperrik ez emen sartu.

*Indautxuko jesuitetan, Pazkoazko erri-mezan,  
meza aurretik kantau nebana:*

Alkartu eta poztu gaitezan  
meza santua entzuteko,  
meza santua azken aparian  
Kristok jarria dalako.  
Bere ordezkoa gerturik dago  
berbera barriztuteko,  
Kristo bera da meza esaille,  
abadea bitarteko.

*Ez naz orotzen beste au non kantau neban:*

Egun andi au asi dagigun  
kristau zintzoen antzera,  
emen gatoz gu abadeakin  
meza ontan alkartzera.  
Onek ekartzen dau poz andia  
kristauaren biotzera,  
Jesus Jauna be etorriko da  
oraintxe geure artera,  
egun andi au igaro daigun  
danok Beragaz batera.

*Oparian:*

Zeruetatik etorten jaku  
eguzkia ta euria,  
bere bitartez dogu munduan  
frutu eder ugaria.  
Ori eskertzen agertzen jaku  
kantari alai txoria,  
Zeruko Aita, guk gizonok be  
egin nai dogu geuria,

abade jauna bitarte dala  
artu gure oparia.

*San Migel eguneko meza baten:*

Gure San Migel Jaungoikoaren  
gudari leial izan zan,  
Luzifer arro jaso zanean  
Aitaren alde jaso zan.  
Gaur be gogotsu eskau daiogun  
ospatzen gagozan mezan,  
mundu ontan be jaso daitela  
danok askatu gaitez.

*Arimen aldeko otoian:*

Kristauarentzat meza santua  
otoirik ta ederrena,  
bere barruan sakonena da  
zati ontan dakarrena.  
Une onetan egiten dogu  
il ziran alde omena,  
Zeruko Aitari eska daiogun  
danentzako atsedena.

*Izurtzan kantatua:*

Meza andi au izango al zan  
entzule danon gogoko,  
Jaungoikoakin bat egoteak  
neurrik ez daukalako.  
Bada bera da eguneroko  
indar barriak artzeko,  
eta azkenez Jaunak diñosku  
bake santuz joateko,  
geuk be berari emon daitzegun  
biotzez eskerrik asko.

*Esker emotea:*

Ordu erdi bat geugaz egonda  
au diñosku azkenean:  
“Joan zaitzeze bake santuan,  
zintzo ta maitasunean”.  
Egille eta Artzain onenak  
orrela diñoskunean,  
gitxienez be ein bear geunke  
jarrai bere esanean.



# Gaurko mundua

---

- 1 Gaurko munduan zapaltzaille ta traiziño dan lez edonon, epaitzailletzat bear litzake aldi bateko Salomon, gaurko burrukai egin dagion biei errazoia emon, ia orrela argitzen badau errazoi ori non dagon.
  
- 2 Nazkagarri ta lotsagarri da gaur egun ikusten dana: fanatikoak egiten dabe juezarentzat dan lana. Eta ori da Jainko-legean justizientzat orbana, eun kintel kare bizi botata desagertuko eztana.
  
- 3 Bai badakigu tiroz ilteak ez dirala krimen onak, baiña txarrago dira asko be tortureakin emonak. Bat eta beste dira benetan arrigarrizko krimenak, Jesusek berak esan daijala zeintzuk diran andienak.

- 4 Agintaritzan dagozan batzuk  
ikasten dabe ostuten,  
eta orrela gure erriak  
ez dira aberastuten.  
Gizon orreitan kontzientzidun dan  
listorik ez da ikusten,  
gaur edo bier jakingo dala  
ez dira konturatuten.
- 5 Mundu guztiak ikusi daian  
mendian il eben Kristo,  
eta gaur barriz zeldan zigorrez  
edo baiñerean ito.  
Eta orrela ez bada ilten  
tiro bat emon ta kito,  
ta iltzailleak eroeak lez  
aske eta señorito.
- 6 Gaur politiko askorena da  
iskindutakoa aztu,  
diru artean sartu orduan  
al daben guztia ostu.  
Jaunok, izan nai ez badozue  
lapur ta madarikatu,  
bakezaleai bakean itxi  
ta ez gaitzuez txoratu.
- 7 Eredu izan bear leukenak  
agintariak izanik,  
asko dira gaur eurak jarriko  
legeak bete ezinik.  
Au ikusirik oin bardin tinko  
indartsu auxe diñot nik:  
ez daukagula legerik edo  
ez dagoala gizonik.

8 Begi aurrean ikusiakin  
sartu leiteke bildurra:  
jakitun askok egien aurka  
gaur sartzen dabe muturra.  
Ta maltzurkeriz ipinten dabe  
egi itxuran guzurra,  
guzurrai emon errazoia ta  
egi onari egurra.

9 Agintariak aginduteko  
daukie joko doblea:  
bake santua aitetu baiña  
gora jasorik sablea.  
Indar askogaz aupatzen dabe  
Jesukristoren legea,  
baiña praktikan deabruena  
au dabelako obea.

10 Egin bearrik bearrena da  
bake santua lortzeko,  
diñotseguna: ganean dogun  
oin astun ori kentzeko.  
Eurantzat bada bake santua  
geu lotuak izateko,  
bide ortatik gure bakeak  
atea itxita dauko.

11 Mundua eta bertan dagona  
gure Jainkoak egin du,  
eta Jainkoak emondakorik  
iñok ezin leike kendu.  
Baiña bakotxai emondakoa  
bakotxak bear dau zaindu,  
berak bakotxai emondakoan  
iñok ez daien agindu.

- 12 Mundu onetan nai andi izan  
nai ondasun asko euki,  
premiazkoa euki ezean  
izan leiteke erruki.  
Azken orduan andiena be  
biurtu leiteke txiki,  
eriotzea datorrenean  
ondo ilten ez badaki.
- 13 Gure Jesusek aberats bati  
esana ondo aditu:  
"Zabaldu zeure ondasunak ta  
nire bidean jarraitu".  
Aberats orrek lepoa emon  
ta lengo bidea artu,  
ori baiño be txarragoa da  
txiro danak menperatu.
- 14 Aberats askok egin dauskue  
Kristoren dotriña ostu,  
gero guztia arakatu ta  
nai dana bakarrik artu.  
Gizon ondrea engaiñatzeko  
deabruanakin nastu,  
guzurrezkoa on artu eta  
egiazkoa guzurtu.
- 15 Gaurko mundu au aurkitutzen da  
laiño baltzez estalduta,  
ta gizon asko laiño artean  
euran iparra galduta.  
Anai guztiok, jarri gaitzen  
zuzentzeko alkartuta,  
zintzo jokatzen daben erria  
oraindik salbau leike ta.

- 16 Kontzientzian zaindu bear dau  
gizonak bere eritxi,  
eta kalumni edo guzurra  
egi-itxuraz ez jantzi.  
Bera berean ziur badago  
gogortasunagaz eutsi,  
bada gaur ontzat artu ez arren  
artu leike bier etzi.
- 17 Mundu au dogu batzuentzako  
leguna eta erreza,  
beste batzuntzat guztiz samiña,  
gogorra ta aldrebesa.  
Batzuek uger ondasunetan,  
beste askok ezer eza,  
kontzientzia izango dogu  
ortan azkenez jueza.
- 18 Gizon batzuek euran agintzan  
jokatzen dabe ain zikin,  
eta ez dago agintze onik  
olako gizonarekin.  
Esaereak argi diño ta  
au guztiok ondo jakin:  
azken garbira ez dala eldu  
iñor atze zikiñakin.
- 19 Gaurko munduak amurruz dagon  
piztiaren antza dauka,  
erdi inguru aurkitutzen da  
beste erdiaren aurka.  
Alde bata da pizti antzera  
aginke eta erpaka,  
eta bestea abereak lez  
ostikoka ta adarka.

20 Agintariak euran lekuan  
dauke lepalpen astuna;  
bear dan legez emon bearra  
erriari erantzuna.  
Orretarako bearrezko da  
lenengo izan gizona,  
danen ganetik agertuakin  
gizonen gizontasuna.

21 Agintari ta eliz-gizon ta  
danok bakea eskatzen,  
baiña indarrak au lortuteko  
argi ez dausku jokutzen.  
Eta indarren biotz gogorra  
ezpada zerbait biguntzen,  
or egon ziur bide ortatik  
bakerik ez dala lortzen.

22 Andi batzuek guztia sobran,  
asko gosez ta negarrez,  
biziteko lain ez daukienak  
ezbear eta naigabez.  
Iru-lauk dauke larregi eta  
besteak barriz ezer ez,  
au iñorentzat ez da ona ta  
gogoan artu mesedez.

23 Engaiñutikan otza dator da  
egiagandik beroa,  
eta beroak bultza egiñik  
au esatera naroa.  
Engaiñuakin egiten danak  
bide onik ez daroa,  
eta begira zer izango dan  
ortik datorren geroa.

- 24 Geure artean dogu zezena  
or adarkadak emoten,  
eta berari adarretatik  
iñok ez dautso elduten.  
Bat eta beste kostako jaku  
zezen ori geldituten,  
guztiok alkar berba eginda  
geu ez bagara aituten.
- 25 Gizonak alkar galdu dabe ta  
errespeto ta lotsea,  
beretzako dan paradisia  
biurtu zoro-etxea.  
Bere eskuetan eduki eta  
zorionaren giltzea,  
lelokeririk andiena da  
eskuan dana galtzea.
- 26 Beti agindu nai daben batzuk  
or dabiz ekin ta ekin,  
euran poltrona ez galtzarren  
nai eta jokatu zikin.  
Baiña lelotzat gagozan ok be  
au ondo dakigu jakin:  
gauza garbirik ezin leikela  
lortu joko zikiñakin.
- 27 Gure munduak gaur arte beintzat  
istori txar asko dauko,  
ta zoritxarrez argi andirik  
ez dauka aurrerantzako.  
Merezi ez dun indar gaiztoak  
askatasuna badauko,  
askatasunik ez da izango  
merezi dabenentzako.

- 28 Munduak beti emoten dausku  
frutu ederra ta asko,  
ondo bananduko balitzake  
naikoa guztiontzako.  
Baiña batzuek artzen daben lez  
iñona be eurantzako,  
txiro umillak aurrerantza be  
txiro jarraitu bearko.
- 29 Nazkaturikan dauke erria  
gaur diran zikinkeriak,  
eta geienak egiñak dira  
dagozan agintariak.  
Ain direan lez atz andikoak  
igarri dautse erriak,  
atz ori ondo susmatzen da ta  
zabaldu barik begiak.
- 30 Batzuek esaten daben berbeak  
ez dau balio ezer be,  
iskindutean ez diralako  
esaten dabenen jabe.  
Poltrona ori lortu artean  
edozer iskintzen dabe,  
ta gero asko gelditzen gara  
iskindua artu gabe.
- 31 Mundu onetan sortzen dan danak  
dau bere eskubidea,  
bizia artzen daben guztiak  
eta bakotxak berea.  
Au aldatzeko ez da naikoa  
ministro nai erregea,  
iñok ezin dau aldatu eta  
Jaungoikoaren legea.



32 Mundu onetan gizonak beintzat  
sari bat baiño ez dauko,  
eta munduan irabazia  
izango dogu betiko.  
Eta bizitz au laburra dan lez  
zintzo jokatu lortzeko,  
orain ez bada geio erarik  
ez dogulako eukiko.

33 Munduan gizon guztiok gara  
anai eta gizarteko,  
eta munduan dogun guztia  
dogu guztiorentzako.  
Jesukristoren dotriña da  
ta berak esanda dauko:  
emen aberats lapurra dana  
zeruan ez da sartuko.

# Balendin Enbeita

---

*Balendin Enbeitaren omenaldian, Donostian:*

Aizu, Enbeita, gure bertsoa  
egon zanean gaixorik,  
zuk bertsoetan jarraitzen zendun  
beti adorez beterik.  
Omen eder au merezi dozu,  
ezta nik esan bearrik,  
Gipuzko aldean zaindu ebien  
Uztapidek ta Basarrik,  
baiña Bizkaian zuri eskerrak,  
zuk zaindu zendun bakarrik.

*Balendin Enbeitak txarri-afari batera inbitatu  
nindunean, nik bialdua:*

Lagun Balendin, inbitau nozu  
zure txarri-afarira,  
baiña zurea eta nirea  
or egun berean dira.  
Zurekin pozez izango nintzan  
suertatu ez balira,  
on egin eta alai igaro,  
ez egon neri begira.



*Balentin Enbeita, nire biotzeko lagun on zarra, bere bizitzako azken bertsoak kantatzen, nire omenaldian. Aita Lino Akesolo zana beste aldean. Neu erdian.*

*Muxikan, Enbeitari iskindutako omen-afari batean:*

Gure Balentin aitatutean  
bearrezko da bertsoa,  
gure bertsoa izan zalako  
bere bizitza osoa.  
Aren bertsoa beti izan zan  
gogorra baiña gozoa,  
gure erriko kultur-arloan  
kementsu ta ganosoa,  
a gelditzeko etzan naikoa  
bonba ta kaiñonazoa.

*Bilboko Arenalean, Balendin Enbeitaren irudia  
jarri eta agertu zanean:*

Gure Enbeitak agertu eban  
beti euskaldun itxura,  
jarraitu be bai bide zuzenez  
arbasoaren oitura.  
Baita zaindu be oso kementsu  
gure erriko kultura,  
bere irudi emen daukagu  
jasorik bere lekura,  
gero mundua amaitzekoan  
Arenaletik zerura.

*Lagun Enbeitaren illetan, Muxikako elizan:*

Nire begiak negar ein dabe  
eta biotzak irikin,  
azken agurra geure bertsoan,  
nire lagun zar Balentin.  
Euskal Erriak ikara egin dau  
zure aldakuntzarekin,  
zuk egindako lan frututsua  
errez ezingo da jakin,  
gure Jainkoak geio nai badau  
zeruetan bere ekin.

# Balentin Berriotxo

---

1 Kain gaitzoa izan zanetik  
or gaurko egunetara,  
martiriekin beteta dagoz  
munduan ainbat altara.  
Egun oneitan aintzindariak,  
bai, bizkaitarrok geu gara,  
gure Balentin jaso dalako  
gorengo mailla ortara.

2 Gure Balentin gaztetatik zan  
umilla eta apala,  
Jainkoarentzat lortu nai eban  
arimen mundu zabala.  
Jakin daiela mundu guztian  
Balentin euskaldun zala.  
ta euskaldunok Euskal Erriak  
santu andi bat daukala.

3 Aitak etxean nai izan arren  
arotzian laguntzeko,  
Jaunaren deia artu eban lez  
au ez zan bere barruko.  
Ejerzitu bat jarri bazan be  
beretik aldatuteko,  
erabakia arturik eukan  
au aitak esan orduko.

- 4 Gaztetxotatik eukan berotan  
biotz barruko txingarra,  
bere barruan sarturik eukan  
zeru ganeko izarra.  
Ta izar orrek argitaratu  
non zan zeruko iparra,  
eta orrela betetu eban  
munduko egin bearra.
- 5 Jainkoarentzat arima billa  
maitasun ta oraziño,  
naita bidean beti aurkitu  
sasi, arantza ta laiño.  
Ori zan bere asmo bakarra  
bizia emoteraiño,  
eta bizia emon ezkeru  
ezin geio ori baiño.
- 6 Bertsotan esan al bada beintzat  
zer diran gure santuak,  
esango neuke eurak dirala  
Jainkoak berak autuak.  
Bakotxak doguz geure argiak  
Jaunagandikan artuak,  
baiña santuak daukez aparte  
mirarizko merituak.
- 7 Bai izan ziran samin ta negar  
Balentin il zan garaian,  
baiña gaurkoan alaitasuna  
Erroman Pedron zelaian.  
Auxe berau zan Elorrion be  
egun andi ta alaian,  
gaurtik santu bat daukagulako  
Balentinekin Bizkaian.

- 8 Munduarentzat zorion billa  
maitasun beroenakin,  
baiña Tonkin-en bere asmorik  
jentilek ez eben jakin.  
Txartzat artuta samea kendu  
ezpata aundi batekin,  
zer egin eben ez ekien ta  
danei parkatu, Balentin.
- 9 Euskal Erriak zorionean  
oso santu onak ditu,  
euron odola daroagunok  
au bear dogu aitortu.  
Santu-bide au gogorra dogu,  
nork ezin leike sinistu?  
Baiña garaitza lortu nai bada  
geure santuei jarraitu.
- 10 Euskal Errian ez doguz baiña  
geure santuak ugari,  
daukaguzanak oso aundiak,  
eroe edo martiri.  
Bizkaian da gaur gure Balentin,  
eskerrak Elorriori,  
aurrerantzean izango dana  
Bizkai osoko zaindari.

(1988-VI-19)

# Erriaren seme txarrak

---

- 1 Gure erriak igaro dituz  
samiñak eta negarrak,  
eragin eta gu zapaltzera  
etorri ziran indarrak.  
Kanpoko eta barrukoak be  
guztiak ziran zantarrak,  
baiña kalterik geien egiñak  
erriaren seme txarrak.
  
- 2 Burukideak poltrona truke  
saldu dira Madrillera,  
gure maisuan irakatsiak  
itxirik alde batera,  
Sabinotarrak itxartu eta  
arduratzen ez bagera,  
bere dotriña aztuko da ta  
azurrak Eskorialera.
  
- 3 Erriarentzat zeaztasun bat  
iñoz ez dabenak euki,  
errian buru agertu dira  
asko poliki-poliki.  
Ta artu be bai meritu barik  
goiko mailla edo aurki,  
beste gerra bat sortuko balitz,  
Euskadi, zure erruki.



4 Errian alde ein bear balitz  
tiroka edo burruke,  
batzokietan gaur diran askok  
eusko odolik ez dauke.  
Sabin maisua orain barriro  
etorriko balitzake,  
batzokietan gaur daukaguzan  
asko kanpora ostike.

5 Batzuk eurantzat esaten dabe  
eurak ez daukela utsik,  
kasu orretan gaur ez da falta  
gaizto eta arropuzik.  
Euran aldera izan ezkerro  
deabruagaz be pozik,  
eta Jainkoa bera be txartzat  
euran alde egin ezik.

6 Gure erria zoriontsu zan  
libre izan zan aldian,  
zuzen ta alai bizi zan beti  
bere lurralde garbian.  
Baiña galatza sartu zanean  
bertako lorategian,  
zapo baltzak be sartu zirean  
txori alaien kabian.

# Geure bidea

---

- 1 Munduan dogun bizitzea da  
zerurako pasadizu,  
eta mundu au jarria dogu  
bertarako arri-pozu.  
Arri orretan egiten bada  
lapraska edo tropezu,  
bere mugara eldu baiño len  
gelditu bearko dozu.
  
- 2 Mundura gatoz igaroteko  
pasadizuko denpora,  
baiña begitu zertarako ta  
baita nondik eta nora.  
Gogorra dogu au ausnartzeko  
baiña begiratu gora,  
ta fede onek iraun daijala  
urrengotik urrengora.
  
- 3 Mundu onetan geure bidean  
izar bat dogu dizdira,  
ta ikusteko geure begiak  
zuzendu bear argira.  
Bada itxuan baldin bagoaz  
loikeriari begira,  
zikinkeriaz lortutakoak  
inpernurakoak dira.

- 4 Munduan onik egin al bada,  
nai izan asko nai gitxi,  
al dogun arte egin dagigun,  
egin bagerik ez itxi.  
Urkoarena errespetatu  
ta nork bereari eutsi,  
oillo giñala esan ez daien  
gero bier edo etzi.
- 5 Jesukristoren dotriña dana  
egiten dogu sinistu,  
oberik ez da iñon bere ta  
ez dogu nai bera nastu.  
Tema orretan euskal kristauak  
zer naiago dun begitu:  
zikiñarekin salbatu baiño  
garbiakin kondenatu.
- 6 Zorionean sortuak gara  
geurea ez dan munduan,  
eta al dana egin dagigun  
Uzabak nai daun moduan.  
Geuk al doguna egin dagigun,  
egin al dogun orduan,  
ezin danean esan dagigun:  
"Al zana egin genduan".
- 7 Gaur ikusten dan naste borrhastek  
bat egiten dau nazkatu,  
baiña nozepein egiten jaku  
argi-izarra agertu.  
Naita laiño baltz eta guzurrak  
zapaldu eta zigortu,  
zintzo diranen itxaropena  
iñoz ezin da agortu.

8 Joan Paulok dauku biotz andi bat  
itxaso zabal antzeko,  
ta bertan dauka leku txiki bat  
Euskal Erriarentzako.  
Iru-lau berba ikasi zitun  
euskaldunoi esateko,  
istorirako izango diran  
lau berba urre gorrizko.

9 Gure Joan Paulok lurralde asko  
anaikor bisitau ditu,  
bertako lurra zapaldutean  
auspeztu eta mosutu.  
Erri danetan egin arren be  
Euskadin etzan makurtu,  
ikusten danez Euskal Erria  
erritzat ez eban artu.

10 Espaiñiako abade asko  
il ziran fusilaturik,  
merezi be bai ta gaur daukaguz  
altaretara jasorik.  
Euskadin be au igaro eben  
ainbat abade martirik,  
santuen maillan ezartzekoak  
iñon badogu santurik.

11 Abade asko bildur diran lez  
gauzak diran lez esaten,  
zoritxarrean asko ta asko  
asi da fedea galtzen.  
Lendik barruan daukagun zarrok  
ez bagoiaz be aldatzen,  
zail izango da gaur daukaguzan  
gazteak elizaratzen.

- 12 Gauza andia gizonarentzat  
bera beintzat salbatzea,  
baiña geiago lagun urkoa  
salbatzen parte artzea.  
Gizon guztiok zerua dogu  
gure betiko etxea,  
lelokeririk andiena da  
eskuan dana galtzea,
- 13 Gizonak zerbait jakin naiean  
egiten dau alegiña,  
ta lortu dituz teleskopio,  
Apolo ta egazkiña.  
Baiña au dogu gizonarentzat  
autorkuntzarik aundiña:  
iñoz ezingo dabela lortu  
azkenik bako urriña.

# Bakearen alde

---

- 1 Gizonak alkar aitu gaitezan  
errazoiz ta aoz ao,  
ori dalako bide zuzena,  
ni beintzat orretan nago.  
Eta bakea lortu dagigun  
geroa baiño lenago,  
bada guztia ondatzen bada  
gerorik bere ez dago.
  
- 2 Andi ta txiki, agintari ta  
obispo bake eskatzen,  
ta zelan lortu jakin arren be  
iñok ez dausku esaten.  
Batak besteai erru botata  
or dabiz zirkulu baten,  
ez da lortuko zapaltzailleak  
ez badirade biguntzen.
  
- 3 Parkaziñoan alde daukaguz  
obispo ta Aita Santu,  
eta ori da birtute on bat  
bear doguna onartu.  
Baita beste bat be bada ona:  
alkarri errespetatu;  
errespetoa gugaz badogu  
ez daukagu zer parkatu.

- 4 Alderdi batek eskatuten dau  
oiuka bake santua,  
eta besteak "Emon eidazu  
lenen zeuk neuri ostua".  
Borroka ortan zabaldu ezik  
indarrak bere eskua,  
ezingo dogu ezelan kendu  
gerrarako arriskua.
- 5 Agintaritzan aurkitzen dana  
beti bake eske dago,  
gerraren aurka jartzen da beti  
danak baiño aurrerago.  
Bere poltrona bertan galtzeko  
arrisku baten balego,  
ordun naiago gerra zantarra  
au galdu baiño lenago.
- 6 Zapaltzailleak agertzen badau  
gorrotoz indarkeria,  
menpe dagonak agertu bear  
azalez apalkeria.  
Baiña menpean dagon artean  
izango da gudaria,  
zigorrez ez da osatzen eta  
biotz barruko zauria.
- 7 Kalte andiak ekarten dituz  
alkar ikusi eziñak,  
ainbeste edo geiago dira  
indarkeriak egiñak.  
Jakin daiela arroputz eta  
baita be buru ariñak,  
burua eta txapel-lekua  
ez direala bardiñak.

- 8 Indar danakin kondenatzen dot  
kondenagarri tristea:  
edonun jarri lergailluak ta  
andra ta ume iltea.  
Kriminalkeri andiena da  
onen ondoan bestea:  
lenen esku ta oiñak lotuta  
*garrote vil* emotea.
- 9 Kurutz santua daukan erria  
goiko mendi gaillurrean,  
menperatua dogu gaur egun  
eta zigor gogorrean.  
Zu maitasuna zabaldu nairik  
anai arteko lurrean,  
baiña bakea nai ez daun asko  
aurkitzen dogu aurrean.
- 10 Gizonak bakez izan nai badau  
mundu ontan askatua,  
beragan dauko eskubidea  
sortzean bertan artua.  
Ta gero barriz biurtzen bada  
zapaldua ta lotua,  
zapaltzaillea beti-beti da  
gizon madarikatua.
- 11 Euskal Erria beti izan da  
umilla ta baketsua,  
baiña berea zaintzeko beti  
gogorra eta zantzua.  
Gizon artean aituteko be  
ez da gorra, ez itxua,  
augatiño dau bere bizitza  
argia ta mamitsua.



- 12 Joko zikiñak ikusten dira  
zoritxarrez gaur edonon,  
Jainkoari ta deabruari  
biei errazoia emon.  
Baiña Ebanjelio santuan  
zelan idatzita dagon,  
Jainkoakin ta deabruakin  
biekin ezin da egon.
- 13 Igaro gendun gerra zantarra  
tiroz amaitu zalako,  
gorrotoakin amaitu zan da  
oraindik zauria dauko.  
Eta zauri au izan ez daiten  
erriarentzat betiko,  
osatu daigun edo bakerik  
iñoz ez dogu eukiko.
- 14 Gotzaiñak eska militarrari:  
"Ai, arren zaindu nagizu";  
eta erantzun: "Zainduko zaitut  
bedeinkatuten banozu".  
Jesus aldatu aurretik eta  
Judaseri emon mosu,  
egiari ta errazoiari  
bonba ta tiroz jo ta su.
- 15 Erbestetarrak sartu jakuzan  
euskaldunari etxean,  
arma zantarren indarrarekin  
artuak giñan menpean.  
Eta gorrotoz diñosku gaur be  
ez gagozala bakean,  
bakerik iñok ez dau emoten  
menpean dagon artean.

- 16 Danok dakigu espaiñatarrak  
euran menpean gaitula,  
alan da bere jakin daiela  
gorrotorik ez dogula.  
Guk borrokarik ez dogu asi  
iñorekin ta sekula,  
eta bakea gura dabenak  
bakean itxi dauskula.
- 17 Ez gizon eta ez emakume  
ez garan lez onak danok,  
zirikatuak izaten gara  
bakez bizi nai dogunok.  
Txori guztiak or dagozan lez  
bildurturik lau arranok,  
era orretan dauke mundua  
lau lotsabako marranok.
- 18 Tiroz amaitzat izan dan gerrak  
odola dauka biztuta,  
egunen baten jagiko dana  
bere indar barriztuta.  
Zein burubako egon leiteke  
amaitze au sinistuta?  
Au da egia: lenengo gerra  
oindo ez da amaituta.
- 19 Erria dogu alkar borrokan  
gorrotoz amurruturik,  
ta bitartean famili asko  
txarto samiñez beterik.  
Alkar diñotse: "Alperrik zabiz,  
ez dozu ezer lortzerik".  
Alkarrizketarik ez badago  
or biak dabiz alperrik.

- 20 Gerra guztien erruak dira  
munduan indarrarenak,  
euranak dira beti egiak,  
guzurrak argalarenak.  
Baita gaiñera artu bear be  
zigorrik ta gogorrenak,  
ta frutu onik ez dakar iñoz  
zigorretik datorrenak.
- 21 Indarkeriak beti egin dau  
argala menpean artu,  
ixilik eta umil ez bada  
kartzela batera sartu.  
Sakratuaren aurrez jarri ta  
egin leike juramentu,  
indarra baiño zantarragorik  
munduan ez dala sortu.
- 22 Amatxo batek seme guztiak  
alkar ta ondo nai ditu,  
baiña semeok gaizto gara ta  
ezin gara alkar aitu.  
Eta amari bere oiua  
ez dautsagu nai aditu,  
ta deabrua adi dagon lez  
danok atrapatzen gaitu.
- 23 Nazio baten iztegietan  
itz ugari dagolako,  
sarri askotan egi antzera  
apaintzen da guzur asko.  
Argi andirik ez dan lez bear  
bistan dana ikusteko,  
gaur erritarra itxarrik dago  
ipuiñak arrazoteko.

- 24 Erri andiak erri txikia  
menpean euki nai dabe,  
ori dala ta gure erriak  
bai dauka naiko naigabe.  
Eurak dituez eskubideak,  
gu barriz orixe gabe,  
eta gaiñera ez dausku ixten  
geu garana izaten be.
- 25 Tamala da guk gure gerrea  
zer zan be ez jakitea,  
tamalagoa zer zan esanda  
sinistu ez egitea.  
Nik ez dautsat, ez, iñori be nai  
or gerra baten iltea,  
baiña askori falta jakie  
gerra baten ibiltea.
- 26 Arerioa sartu zanean  
gorrotoz gure errian,  
gudari zarrak jarri gintzazan  
benetan giro larrian.  
Monumentu bat merezi eta  
plaza nausien erdian,  
baztertuta lez aurkitzen dira  
asko erdi miserian.
- 27 Arerioai aurka egiten  
emakume ta gudari,  
askatasuna lortu naiean  
eutsiten nortasunari.  
Gora ta bera begiratuta  
argirik ez zan agiri,  
igaro ez dun iñok ez daki  
urrik emon zer dan ori.

28 Gudari zarrak igaro gendun  
gerra zantar bat itzala,  
gaurko gazteak askok ez daki  
odoltsua izan zala.  
Kriminalari ezin dautsagu  
agertu biotz zabala,  
il zireanak esan ez daiskun  
traidore batzuk garala.

# Itxaropenik ez galdu

---

- 1 Eskubiderik sakratuena indar gaiztoak zapaldu, eta umillak errazoiakin aorik ezin zabaldu. Justiziaren zain da umilla au noz egingo dan eldu, etorriko da egunen baten, itxaropenik ez galdu.
- 2 Eskatzen dabe askatasuna mundu guztiarentzako, baiña urkoa lotu nai dabe askatasun au lortzeko. Aske zalea izan arren be iñor lotuta badauko, askatasuna eskatuteko eskubiderik ez dauko.
- 3 Euskaldunok zapaldu gaituez gaur arte era askotan, eun da berrogetaka urteak gabiltza borroka ortan. Eta oraindik anai-arrebak erbeste ta kartzeletan, oba borroka garbi baten il orrela izatekotan.

- 4 Arduraz dagoz galdu ez daian  
Espaiñak bere zatirik,  
ta arraia or dauke Espaiñak  
beti lez oso-osorik.  
Esaten dausku geureakin be  
ez dogula errazoirik,  
au da bakarrik ez dabela nai  
zapalkuntzea galtzerik.
- 5 Argi apur bat daukanarentzat  
au da guztiz arritzeko,  
indar zantar bat jaso zan tiroz  
doi argiak ebaitzeko.  
Fusilatuak euran erria  
maite izan ebelako,  
Jaungoikoaren legean orrek  
parkaziorik ez dauko.
- 6 Beti gagoz geu alkar iltea  
txarto dagola esaten,  
ta amurrua amaituteko  
ezer ez dogu egiten.  
Epai onetan Salomonen bat  
ez bajaku agertuten,  
era ontako borrokarikan  
iñoz ez da amaituten.
- 7 Geure erria benetan dogu  
polita eta liraiña,  
langillea ta oso argia  
ta barrupean apaiña.  
Baiña albotikan daukazan lez  
Prantzia eta Espaiña,  
bien artean ekarri dautse  
maltzurkeri ta zizaiña.

- 8 Santu martiri asko il eta  
gero bertan bera itxi,  
eta kriminal izan ziranak  
santu andiak lez jantzi.  
Egia da ta esan bear da  
nai batzuk ezin iruntsi,  
txarrago da ta gaur isildua  
jakitea bier etzi.
- 9 Tamalez iñoz gaur egiten da  
krimenez Jauna iraindu,  
famili asko negarrez jarri  
eta erria samindu,  
Sarri amari senarra eta  
umetxoai aita kendu,  
Kainek egin ebanakin be  
ezin leikena bardindu.
- 10 Ikusgarririk baldin badauka  
ikustez baratz apaiñak,  
edertasuna emoten dautse  
bertako lora bikaiñak.  
Zintzoen fama andia dauko  
Ameriketan Espaiñak,  
ori guztia emoten dautso  
Euskal Erriko artzaiñak.
- 11 Danontzat dagon elmuga dogu  
mundu onetan sortuak,  
okerrik bada guztiak dira  
gizonak berak artuak.  
Augaitik dira batzuk kriminal  
ta beste batzuk lotuak,  
lege txar asko jartzen dituz ta  
indar madarikatuak.



12 Urkamendira doanari be  
zer esanikan badauko,  
garrantzitsua izan leike ta  
entzun egin bear jako.  
Azken gogoak esan leiken lez  
sarriten zer pentsau asko,  
istorirako izango zana  
galdu leiteke betiko.

13 Gizonak beti bizi bear dau  
bere itxaropenean:  
zer zoriona itxaro dogun  
frutua lortzen danean.  
Itxaropen au baldin badago  
biotzaren sakonean,  
zorion utsa izango dogu  
zerura goiazanean.

14 Gure Jainkoak emona dogu  
danok geure eskuetan  
zorionaren azi-garua  
ereiteko lur onetan.  
Baiña gizona esker gabe ta  
zentzun bakoa benetan:  
zorionaren azia ito  
eta ez itxi ernetan.

# Gorbeiaiko kurutzeari

---

- 1 Aita Santuak eskatu eta  
garaia etorri zanean,  
kurutz santuak jarriak ziran  
mendirik altuenean.  
Gorbeia dan lez mendi eder ta  
altua zorionean,  
bertan jarri zan kurutz santua  
kristauaren izenean.
  
- 2 Gaur Gorbeian dan kurutz ederra  
beso zabalik dizdira,  
guztiontzako argi egiten  
zeruetara begira.  
Mendizaleok goazen alai ta  
gogotsu Gorbei mendira,  
bada bertatik ikusten diran  
danak marabillak dira.
  
- 3 Goitik datorren argirik barik  
ezer ez dan lez ikusten,  
an dago beti beso zabalik  
bidera argi egiten.  
Zuzenbide dan argi ortatik  
ez bagara al denduten,  
itxaroten dan zorion ori  
aurkituko da nonbaiten.

- 4 Gure kurutza an dago beti  
eguzki nai edur egin,  
guztiontzako maitasunakin  
testigu dala Aldamin.  
Mendigoizale edo artzaiñik  
bizi dan arte Euskadin,  
saiatuko da zure izena  
aintzatua izan dadin.
- 5 Kurutza orrek iragarten dau  
bide zuzenetaikoa,  
zuzenbidean onena edo  
beintzat onenetaikoa.  
Orrez gaiñera esan dagigun  
ori ez bada naikoa,  
arlotan orretan bazkidea da  
Alguztidun Jaungoikoa.
- 6 Mendigoizale eta artzaiñak  
mendien alde azaldu,  
eta mendiko barri ederra  
mundu guztira zabaldu;  
eta laiñoak estaldu arren  
itxaropenik ez galdu,  
bada kurutza an dago beti  
naita laiñoak estaldu.
- 7 Eskubidea eta indarra  
ez dagozan lez alkarrik,  
kurutz santua, zu jaso ziñan  
justizia jarri nairik.  
Kurutz orretan ixuri zana  
izan ez daiten alperrik,  
ibilbidea argitu eta  
ez gaitzuz itxi bakarrik.

- 8 Beso zabalik agertzen deusku  
guganako maitasuna.  
Gure aldetik zer gitxiago?  
Beintzat esker erantzuna.  
Argi urria badaukagu be  
biztu daigun daukaguna,  
eta maitatu egin dagigun  
beintzat geu maite gaituna.
- 9 Gorbei ganeko kurutz santua,  
argi ta maitagarria,  
zintzo diranen itxaropena,  
goizaleen iturria,  
zure azpian asetzen dogu  
goimaitasun-egarria;  
zaindu artzain ta mendigoizale  
ta gure Euskal Erria.
- 10 Mundu ta Jesus eragiteko  
goi-argia da onena,  
bera dalako gizonarentzat  
zeru goitik datorrena.  
naita bertara urreratzea  
izan aldatz gogorrena,  
mendizaleok Gorbeia dogu  
elmugarik ederrena.
- 11 Gizonarentzat oso gogorra  
munduko bizi laburra,  
eta aurrean gertatzen danak  
emon leikena bildurra.  
Gorbei ganeko kurutz, zu zara  
bide argi ta samurra,  
ta gaur nagusi agertu arren  
traiziñoa ta guzurra,  
azken epaian zeu zara beti  
justiziaren gailurra.

# Zeanuri

---

- 1 Zeanuri non dan esaten noa  
nire lenengo bertsoan,  
erri au dago Araba eta  
Gipuzkoaren auzoan,  
Arratiaren buruan eta  
gure Bizkaian altzoan,  
Gorbei mendiko egalean ta  
bere babespe gozoan.
  
- 2 Sarri entzun da nolakoa dan  
Arratiako zekorra,  
beti esan da zekor au dala  
txikia baiña gogorra.  
Baita nik diñot Zeanurikoa  
gogorra eta jatorra,  
bertako seme askok lortu dau  
gizontasunen tontorra.
  
- 3 Euskal Errian bai izan dira  
seme jatorrak ugari,  
au ziur jakin gura dabenak  
begira istoriari.  
Goratzarreak egiten dautsez  
gure Euskal Erriari,  
Euskal Erria aitatutean  
entzuten da Zeanuri.

- 4 Injenioa be bada emen  
naikoa zorionean,  
argitasunez eta baita be  
arkitetura-lanean.  
Etxetxo bat be badogu emen  
errekearen ganean,  
eta geio be egiten dogu  
menesterra dagonean.
- 5 Inguruetan famatua da  
emengo lapikokoa:  
baba gorria tropezuakin,  
baita porru-lapikoa,  
otza kendu ta berotuteko  
saieski ta guztikoa,  
baita gaiñera gozo-gozoa  
ezpanak txupatzekoa.
- 6 Jan-edanean famatua da  
lenagotik Zeanuri,  
edo itandu jan ta edaten  
onuntza datorrenari:  
Errioxako ardaoa eta  
erri bertako janari,  
eta gaiñera printzipalena  
ona, merke ta ugari.
- 7 Kiroletan be zerbait bagara  
naita erronka ez bota,  
segalari ta aizkolari ta  
jaurtitzaille ta pelota.  
Basa-elizak ugari doguz,  
ez dakit zenbat errota,  
eta io be egiten dogu  
bat beintzat martxan dogu ta.

- 8 Kiroletan be izanak gera  
entzute aundiko faman,  
titulu orreik diruarekin  
ez dira erosten dendan.  
Segalaritan txapeldun zana  
or da Egiluztar Kerman,  
jaurtilaria Felix Erauskin,  
au izan gendun superman.
- 9 Gure Felixek ez baeban be  
maisú asko eta otel,  
bakar antzean ibili arren  
ez eban jokatu motel.  
Zeingeiagokan parte artzeko  
artu ebazan lau txantel,  
eta lautatik jantzi ebazan  
Españako iru txapel.
- 10 Gizon santuak be izan doguz,  
bat Ijinio Artea,  
biotz andi bat euki ebana  
birtutez bete-betea.  
Ondarrik bako sakona eukan  
fede ta borondatea,  
egitetatik agertu eban  
zer dan santu izatea.
- 11 Nik bera lako gizonakgaitik  
ezin esan neike asko,  
gizon artean apartekoen  
antzeko izan zalako.  
Zeanurik bere semeai esker  
altura andia dauko,  
Ijiniokin beste mailla bat  
goragora jasoteko.



*Bertso kantari, Zeanurin. Ezkerretik Deunoro Sardui,  
Jesus Mari Sardui eta neu.*



- 12 Jaun Ijinió egon zanean  
bere familia azten,  
etxetik kanpo bota eben da  
zefon larrialdi baten;  
eta biziá dagon artean  
bizi bearra nonbaiten,  
azken urteak igaro zitun  
Saldrapoko Errekarten.
- 13 Gizon artean asperturikan  
igesi eban mendira,  
Saibegan eta Gorbei mendiko  
kurutza bien erdira,  
bakardadean bakera eta  
zuzenbideko argira;  
antxe bizi zan zeruko deia  
noz etorriko begira.
- 14 Eliz-gizonen arloetan be  
bat gendun arzobispoa:  
Aita Zulaibar praile jatorra,  
ordenaz dominikoa,  
Asian eta Ozeanian  
oso mailla andikoa;  
ez dakianak jakin daiála  
au zan Zeanurikoa.
- 15 Iñozente ta kokotzat dauke  
ortik batzuk Zeanuri,  
baiña badaki erantzuten be  
olako listilluari.  
Arroputz orrei saltzen dautsaguz  
guzur ta ipuin ugari,  
adarra ondo jotén jakie  
bai adar-jotzailleari.

- 16 Listillo orrei sartu geuntsien  
bein baten ipuin itzala,  
esan jakien Txinako gerran  
ni jenerala nintzala.  
Baita sinistu be egin eben,  
ori bai zan astrapala,  
konturatu be etziran egin  
iñozente egun zala.
- 17 Zeanuri da Bizkaian beintzat  
lurreldez irugarrena,  
bere lurrean dauko Gorbeia  
mendirik ta ederrena.  
Erritarrak be dauke birtute  
ona eta bearrena:  
beso zabalik artuten dala  
gogo onez datorrena.
- 18 Osatzeko ta indartzeko da  
Gorbeiko osijenoa,  
naturalezak berak dakarren  
garbia eta sanoa.  
Bertara ez da eldu oraindik  
atomiken berenoa,  
Gorbeiak beintzat ez dau galduko  
eguzkiko ozonoa.
- 19 Gorbeian dagoz aize ederrak  
nasaituteko bidiak,  
marabillak be ikusten dira  
itxartuteko begiak.  
Ur onak be bai iturrietan,  
preskoak eta garbiak,  
ainbat egarri asetzen dituz  
Lekaitzko iturriak.

20 Mendizaletan famatua da  
Lekaitzko iturria,  
uda ta negu bardiñ-bardiña  
beti da bere neurria.  
Orrek zer pentsau emoten dausku  
gogoan eukigarria,  
bera dalako penizilina  
asetzeko egarria.

21 Egunsentian entzuten dira  
txorien kantu alaiek,  
goien egazkan aize garbitan  
belatxo eta arraiek;  
eta lurrean arran-soiñuan  
ardi eta basabeiek,  
era ortako arrera dauko  
Sortzailleantzat Gorbeiek.

22 Uri barru ta mendi ganetzaz  
egin daigun konparantza,  
uri barruan dauko gizonak  
sarri robot baten antza.  
Mendian barriz piztuten dira  
adimena ta biotza,  
orregatiño igon gaitezaz  
sarri Gorbei mendirantza.

23 Gorbei orrek be ez dau izaten  
urte guztian on utsa,  
negu-partean izaten ditu  
zurdea eta izotza.  
Politago da eguzkiakin  
pozez saltoka bildotsa,  
danerakoa bear da emen  
ezi dagigun gorputza.

# Gorbeiaiko artzain zarrak

---

1 Jose Muñegi, Ramon Azkarra  
ta Zizilio Erauskin,  
guztiak emen jarri ez arren  
beste batzuk be eurakin.  
Naita estudio eta mapatik  
ikasirikan ez jakin,  
an biziteko naikoa euken  
bertan ikasiarekin,

2 Euran otoiak izaten ziran  
sarritan mendi ganean,  
eta batez be zeru bitarte  
garbi egoten zanean.  
Zeruarekin komunikatzen  
ziran zuzen-zuzenean,  
eta orrela biziten ziran  
zorionik onenean.

3 Egun garbia sortzen zanean  
azkenik etzan ikusten,  
au ikusirik susmatzen eben  
zerbait bazala nonbaiten.  
Egoten ziran izar artean  
zeru-bidea ikasten,  
eta orrela ikasi eben  
zoriontsuak izaten.

- 4 Parrokira be jatsiten ziran  
bai beintzat urtean baten,  
Jainkoari ta kontzientziari  
euran kontuak emoten.  
Gaur diran lako erreztasunik  
orduan etzan izaten,  
baiña alan be nai asko kostatzen  
utsik ez eben egiten.
- 5 Estudioak jasotzen dituz  
gizonak aurki andira,  
zoritxarrean danak ez dagoz,  
ez, zentzunari begira;  
ta zentzuna ta estudioa  
alkarrekin ez badira,  
estudioak eroan leike  
mundua ondamentira.
- 6 Unibertsidade guztietan  
da ikaste, estudio,  
baiña mendian lañoz ta gaubez  
asko ez dabe balio.  
Olakoetan eskatu bear  
deiadarka ausilio,  
eta guztiai erantzuteko  
antxe zegon Zizilio.
- 7 Zizilio zan bere arloan  
umilla eta apala,  
nai txiro izan beti izan zan  
biotz ta esku zabala.  
Esango neuke mundua lako  
biotz andi bat eukala,  
eta bai diñot errazoietan  
zuzen ta gogorra zala.

8 Zizilio zan patriarka jaun  
ango artzain guztiena,  
sokorruren bat entzuten bazan  
beti adi jarten zana.  
Gau erdi baten sokorruka zan  
jausi zan baten laguna,  
eta bertara urreratuten  
Zizilio zan aurrena.

Au jazo zan San Inazio bezpera-gau baten, 1926-  
an uste dot. Lagun bi joan ziran Gorbeiara; eta,  
gaube ilun eta laino itxuagaitik bidea galdurik,  
aurretik joazan laguna farolagaz, jausi ta desagertu  
egin zan, eta bestea sokorruka egon zan ordu bete  
eta geiagoan; eta beragana lenengo urreratu zana  
izan zan gure Zizilio.

# Eskerrak emonez

---

*Donostian, 1990-eko urtarrillaren 21-ean omenaldia jaso ondoren.*

1 Egun aundia urtarrillaren  
ogeitabatgarrenian,  
bertso-famili alkartu giñan  
Bitoria Eujenian,  
Egoalde ta Iparraldea  
maitasun beroenian;  
a igarota nire biotza  
zerbait baretu danian,  
esker beroak emon nai dodaz  
Bizkaiaren izenian.

2 Bertsozaleak txalotu nindun,  
jaso ainbat bertsolarik,  
orain nik ezin geiago egin  
eskerrak emon besterik;  
baiña munduan ez dogu iñok  
zorion alai osorik,  
bada askorik ez eben egin  
Arrati ta Zeanurik,  
baiña nik ezin iñola itxi  
iñor be eskertu barik.

3 Idazlariak trebeak doguz  
bertsolaritzaren alde:  
M. A. eta Garmendia ta  
Basarri ta Aranalde;  
beste askoren artean barriz  
Tele ta Radio talde,  
urre gorriaz apaindu dausku  
bertsolarien sorkalde,  
zuek egiña bertso batekin  
ezin ordaindu debalde.

4 Bai, Etxaluze, egi bikaiña  
zuk bertsotan diñozuna,  
orrenbestera ez da sakontzen  
zertxobait argi ez dana.  
Gure Jainkoak emona dogu  
bakotxaren altasuna,  
eta munduan danok dogun lez  
egin bear bat astuna,  
andiena da altasun orri  
emotea erantzuna.

5 Poz-atsegiñez ikusi eben  
argitan nire begiak  
bertsolaritza aupatuteko  
aurretik agintariak;  
baita eskaindu bertsolariai  
ikusgarrizko sariak,  
Jaunari esker gaur egun bere  
badaukaz gure erriak  
antolatzaile, agintari ta  
entzule agurgarriak.




6 Egun andi bat igaro neban  
anai-arreba artean,  
eta betiko eukiko zaituet  
biotz barruko golpean;  
baita eskertu euskaldun danok  
biotza bete-betean,  
ia guztiok alkartzen geran  
barriz datorren urtean,  
nik beintzat agur egiten dot gaur  
neu joateko ustean.

7 Datorren urtez omentzekoak  
Iraola ta Goiburu,  
bi oneik dira aurten autuak  
egun andi orren buru.  
Zuek izango zarie jainko  
ta gu guztiok aingeru,  
aldi estua da ori baiña  
egon zaitezte seguru:  
zuen anaien eskolta ona  
izango'zue inguru.


# Pelotea

---

- 1 Pelotea da joko garbi bat  
emen egin zana sortu,  
ta orretzaz be gure erriak  
badau zergaitik arrotu.  
Mundu guztira zabaldukan  
gaur egiten dau jarraitu,  
eta amaitu bear badau be  
munduarekin amaitu.
  
- 2 Nik banekian neu enintzala  
ez pelotari andia,  
baiña jokoa eroateko  
baneukala pikerdia.  
Naita sarriten irabazteko  
bota bear izerdia,  
pikerdia da pelotan bere  
ia meritu erdia.
  
- 3 Al dana egin bear dogun lez  
sasoian gagozanean,  
ori betetzen saiatu nintzan  
lanean nai kirolean.  
Urte askokin nago gaur eta  
aurkitzen naz eziñean,  
neuk egindako apurtxo ori  
jarri nai dot papelean.



*Anjelus errezatzen, pelota-partidu baten.*



*Pelota-txapelketa bat irabazi ondoren. Ezkerretik, atzean, neu eta Zelaia; beean, Jose Miguel, Ana Mari eta Pedro Mari, nire seme-alabak.*

- 4 Bizitzan nire egin bearra  
ondo bete dot al dala,  
naita lepoan eroan bear  
kurutza astun itzala.  
Guztien bistan egiten dot gaur  
garai ikurraren gala,  
ondorengoak esan ez daien  
putz utsa izan nintzala.
- 5 Partiduetan egiten neban  
taktika nai dot azaldu:  
ezker ormara baztertu eta  
zabalez justu zabaldu.  
Pelotariak egin bear dau  
bera iñoz be ez saldu,  
eta eskuan dagon pelota  
ganora barik ez galdu.
- 6 Ondo dakigu gure pelota  
kirol gizonkia dala,  
amabietan gertatzen bazan  
*anjelus* egiten zala.  
Gaur ikusten da oitura zar au  
zertxobait galtzen doiala,  
ta galtzen bada oitura zar au  
ez dogu galtze makala.
- 7 Pelotari be izandua naz  
naita golpe gitxi euki,  
indartsuago ziran tartean  
moldatzen nintzan poliki.  
Ta nai ez izan goiko maillako  
Retegi edo Beloki,  
bitrinatxoa beterik daukat  
izanaren gomutaki.

8 Partiduetan egin bear da  
ogeitabirarte lana,  
ta garaille da muga ortara  
lenen aillegatzen dana.  
Emen tantua izaten dan lez  
beti azkenengo *buena*,  
garaillea da ogeitabira  
lenen aillegatzen dana.

# Astoa

---

- 1 Eskaria dot bertso batzuek  
astoi ateratzeko,  
baiña astorik ez dot euki ta  
asmatu egin bearko.  
Lau ankakoak dira astoak,  
anka bikoak be asko,  
txarrena dago asto izan da  
gizon-izena badauko.
  
- 2 Astoi iñoz etxako emon  
merezi dun meriturik,  
baiña gizonen serbitzurako  
ez dago bera lakorik.  
Arriskutik be urrunduko da  
iñon bada arriskurik,  
eta iñoz be ez da gelditzen  
elmugara eldu barik.
  
- 3 Perietan be ez da ikusten  
gaur egun ia astorik,  
ekolojistak ez dabe egin  
bere alde lan askorik.  
Olan badoia galduko jaku,  
ez dago ortan dudarik,  
emen bertsoak faltau ez daiten  
bere alde abisurik.

- 4 Naita bidean doala sartu  
laiño itxu nai lanparra,  
gau ilunez be betetuko dau  
bai bere egin bearra.  
Belarrietan daukazan legez  
brujula eta radarra,  
nai ez ikusi aurkituko dau  
bere kortako baztarra.
- 5 Begira daigun bere ereduz  
zer dogun gure astoa:  
naita batzukin pentsu ona jan,  
beste batzukin lastoa.  
Ta naita bere uzaba izan  
markes ta señoritoa,  
astoak bardin serbituko dau  
markesa nai ijitoa.
- 6 Asto apala, asto jaiο ta  
ezer ez estudiantu,  
beti on utsa egin naiean  
naita tratu txarra artu.  
Bere korotzak egitean be  
badauka ainbat meritu:  
zulo biribil-biribiletik  
laukiak egiten ditu.
- 7 Gizonak eta astoak eta  
baita beste abereak,  
eskubide ta egin bearrak  
doguz bakotxak bereak.  
Baiña indarrak jartzen ditun lez  
bere aldeko legeak,  
gizonak bere murrizten dituz  
astoen eskubideak.



- 8 Ikusgarria bein merkatura  
joan zanean jazioa:  
bere lagunak an ikustean  
egin eban eraso.  
Gogoratu zan egun au zala  
jaia ta egun gozoa,  
naita au izan uzabarentzat  
gutziz arrabioso.
- 9 Naita kargakin eldu zanean  
asto lagun en ondora,  
lau brinkorekin bota ebazan  
arrautzak ta kantinplora.  
Otzara eta bastea be bai,  
traste danak ankaz gora,  
ta bere asto lagunarekin  
antxe izan zan gustora.
- 10 Astotxo ori biztu zanean  
galopez ta arrantzaka,  
or da uzaba bere atzean  
zentella ta arraioka.  
Baiña astoak erakutsirik  
atzea eta bost anka,  
jai artu eban axe zala ta  
astoaren *La Palanca*.(1)
- 11 Astoarena ontzat artzeko  
uzaba dan lez itxua,  
gaiztakeritzat artzen dautso ta  
murrizten dautso pentsua.  
Baiña astoa jatorriz dan lez  
gutziz borondatetsua,  
bere garaian an agertu zan  
asto-jolasen frutua.

- 12 Mundu onetan astoak beti  
izan bear dau morroia,  
baiña astoak bere badauko  
batzuetan errazoia.  
Ta aintzat artzen ez badozue  
argi esatera noia  
astoak bere agertu bear  
dabela bere sasoa.
- 13 Nagusi jauna, zeuk be ikusi  
zentzunez unetxo baten,  
ta ez ikasi astoa baiño  
astoagoa izaten.  
Astoai bere bakean itxi  
euran jolasak egiten,  
morroi apalen arraza ori  
betiko galdu ez daiten.

*Astoak ugazabari diñotso:*

- 14 “Uzaba jauna, asarre zagoz  
nigaitik sarri askotan,  
eta beste bat erosi zeutzat  
orrela izatekotan.  
Nire anaiak izango dozuz  
Abadiñon San Blasetan,  
*Corte Inglés*-en ez dagoz eta  
ezta lau milloi pezetan.
- 15 Astoa naz ta nik egin neikez  
batzutan gauza okerrak,  
baiña zugandik ez dodaz artzen,  
uzaba, tratu ederrak.  
Batzuetan, bai, merezi dozuz  
alabantza ta eskerrak,  
beste batzutan merezi dozuz  
atzeko putz ta uzkerrak”.

16 Mundu onetan gauza guztiak  
dauken lez bere garaia,  
astoak bere antolatzen dau  
sasoian jolas alaia.  
Baiña guztiak dauken beraren  
asiera ta amaia,  
urrengorarte agur egiñaz  
amaitu zan asto-jaia.

(1) *La Palanca* Bilboko kabaret baten izena da.

# Euskerazale

---

- 1 *Euskerazale* sortu zanetik  
aurten ogetabost urte,  
eta ogetabost urte ontan  
lan zuzen ta zailla bete.  
Egun aitako berbaldietan  
entzule artu nun parte,  
a entzun eta artega nago  
neurea agertu arte.
  
- 2 Gure euskera danon ganetik  
euskerea izan daiten,  
zuzendaritzan dagozanari  
nator oiu bat egiten.  
Erri-euskera baiño ez dakit  
ta enator irakasten,  
bakarrik nator neure barruko  
erexitxoa esaten.
  
- 3 Ama Euskerak iraun dagian  
indar danak bear ditu,  
bere semeok egin gaitezana  
Ama zaintzeko alkartu.  
Anaiok, geure ardura ontan  
geu ezin bagara aitu,  
Ama Euskerak ta istoriak  
danok juzgatuko gaitu.

- 4 Nik ez, ez diñot bizkaierea  
ederrena dala, baiña  
bai esan neike benetan dala  
oso leuna ta liraiña.  
Nai eta egin barrizaleok  
baztertuteko kanpaiña,  
erriarentzat benetan dogu  
egokia ta apaiña.
- 5 Guztiok gagoz era guztiak  
bear direala batu,  
orretarako bearrena da  
erri guztiena artu.  
Oiñarria da lengo zarra ta  
ori ez dagigun aztu,  
ta aberastu bear doguna  
oiñarritik aberastu.
- 6 Gure euskerak igaro eban  
benetan aldi larria,  
baiña kaleak ukatu arren  
jaubetu zan baserria.  
Orain kaleak, aurren jarririk,  
sortu nai dausku barria;  
baiña alperrik, ez bada artzen  
baserriko oiñarria.
- 7 Euskera oso bat egiteko  
altasunean banengo,  
nire eretxiz bearren da ta  
egingo neuke lenengo  
euskalki danak ondo pillatu  
ango, orko ta emengo,  
bada guztiak pillatu ezik  
osoa ez da izango.

- 8 Guztiak dabiz alkar tiraka  
ta errazoa daukie,  
baiña guztiak besterenari  
jartzen dautse atxakie.  
Indarrak beti baztertuten dau  
argala eta txikie,  
euskerakin or sartzen bagara  
euskeraren errukie!
- 9 Sinistu danok, Euskal Erria  
gura badogu bizirik,  
ez daigun galdu sakraua dogun  
oiñarrizko euskerarik.  
Bada ezin leike legez izan  
pago bako pagadirik,  
euskerara bera galtzen bajaku  
ez dago Euskal Erririk.
- 10 Euskaldun danok zaindu dagigun  
Ama Euskera maitea,  
eta orretan bearrezko da  
guztiok lan egitea.  
Ez daigun egin geurea nausi  
eta baztertu bestea,  
anai maiteok, ori ez da ta  
seme leial izatea.
- 11 Lurralde danok, errazoi dan lez,  
zaindu nai dogu geurea,  
baiña ez daigun galdu zaintzeko  
eskuan dogun erea.  
Bai, badakigu, zaindu bear dau  
beti bakotxak berea,  
danen ganetik salbau dagigun  
euskaldunok euskerea.

# Pazko egunez

---

- 1 Kristiñauok, bai dogu  
gaur zergaitik poztu:  
arañegun il Jesus  
eta gaur da biztu.  
Bere bizkundeagaz  
Kristok egin ditu  
zeruak zabaldu ta  
mundua askatu.
- 2 Danok askatu gaituz  
eriotz gogorrez,  
gitxi eskatzen dausku  
guztiaren ordez.  
Ta eskatzen dauskun au  
bete geinke errez:  
alkar maitatutea,  
besterik ezer ez.
- 3 Itxartuten badogu  
zertxobait zentzuna,  
au da gure Jesusek  
agertzen dauskuna:  
geugaitik ilteakin  
gugan maitasuna,  
eta biztuteakin  
betikotasuna.

4 Itxartu egin daigun  
geuk geure zentzuna,  
bakotxai emoteko  
bere erantzuna.  
Maitatzen ez badogu  
geu maite gaituna,  
zer eratakoa da  
gure maitasuna?

5 Abestu aleluia  
danok alkartuta,  
Kristok barri ederra  
ekarri dausku ta:  
izango gareala  
il eta biztuta,  
baita bizitza ontan  
gutziz askatuta.

6 Bere jainkotasunez  
erakutsi dausku,  
gogorra izan arren  
zein bide jarraitu.  
Traba asko daukagu  
baiña ez bildurtu,  
Espiritu Santuak  
argituko gaitu.

7 Jesuseren bidera  
egiñik biurtu,  
bertatik jarraitzeko  
asmo ona artu.  
Naita bide au izan  
gogor eta estu,  
Aitaren baratzera  
zuzenduko gaitu.



# Liburu andi galtsua eta txikia mamitsua

---

- 1 Libururako nire lantxo  
nik egin neban zarratu,  
baiña etzala naikoa eta  
bertso geiago eskatu.  
Aita Zabalak libururako  
geiago bear baditu,  
nire iturri ori da eta  
bertsorik ezin ukatu.
- 2 Libururako bialdu neban  
nire lana sobre baten,  
ta erantzuna lantxo orrekin  
naiko etzala betetzen.  
Lan geitxoago bialtzeko ta  
agertuko zala aurten,  
eta geiago bialtzen dautzut  
liburu au bete daiten.
- 3 Nik, bai, badaukot erreztasuna  
bertso batzuk idazteko,  
baiña ez dakit libururako  
zer bear dan jakiteko.  
Nik uste neban bai zala lana  
lau bost libururentzako,  
guztia eta geiago bear  
iru itxuraztuteko.

- 4 Eneuke gura au esatean  
iñor samindu al dala,  
baiña nik diñot liburuetan  
galtzu asko sartzen dala.  
Itxuraz asko andiak dira  
eta apaiña azala,  
barruan mami gitxi badauka  
¿au zer da, aita Zabala?
- 5 Liburua be egin bear da  
bere neurriz itxurazko,  
baiña bertsodun liburu bada  
ori dogu aparteko.  
Euskal kulturaren bertsoa dogu  
zertxobait urre gorrizko,  
ta ontzi andirik ez da bear  
urre gorriz betetzeko.
- 6 Berebillik be elmugaraiño  
egundo ez da elduko,  
deposituan gasolena  
urez nastuta badauko.  
Irakurleai liburuakin  
orixe jazoten jako,  
liburu orrek mamia baiño  
lasto geiago badauko.
- 7 Liburu askok agertuten dau  
galtzua eta basoa,  
aspertzen da bat nai eta izan  
irakurle ganosoa.  
Eta bestetik txikia bada,  
mamitsua ta gozoa,  
epelenak be amaituko dau  
liburu oso-osoa.

- 8 Euskaldunentzat gauza ederra  
*Auspo* bertso-liburua,  
kultur-arloan aberatsa ta  
gaiñera ez da karua.  
Diru guztiak bear dauan lez  
bere leku segurua,  
oso seguru aurkituten da  
or gastatzen dan dirua.
- 9 Txingar bat neukan nire barruan  
kabitu ezindakoa,  
eta txingar au sutan jartzeko  
enintzan izan naikoa.  
Baiña bikote bat arkitu nun  
borondate andikoa:  
Muniategi errekiña ta  
Aita Zabala *auspoa*.

# Azken bertsoa

---

Emen aurrengo bertso orretan  
diñot guzur bat galanta:  
oneik dirala azken bertsoak,  
ondakiñak dirala ta.  
Baiña oraindik Basiliori  
errekienik ez bota,  
Basilioren motorra gaur be  
martxan ta bero dago ta.

# Basilio Pujanari

---

*Basilio Pujanaren Egi batzuek aixetaratzen bertso-liburua irakurri ondoren.*

1 *Egi batzuek aixetaratzen*  
Basilioren emaitza,  
ze gizon mota zeran jakinda  
igartzen ez da ain gaitza.  
Betiko eran gurpildu dozu  
biotz-atariko giltza,  
ze gauz ederra gizon bakoitza  
zu bezain jator balitza!

2 Ugerkazelai baserritxua  
Zulaibar auzo erdian,  
guraso on bik maite-lekua  
jarri eben alderdian.  
Mundu argira etorri ziñan  
zeru-emaitzen gurdian,  
autuentzako bakarrik dagon  
izar on giro gordian.

- 3 Seme barri bat "bildur ta poza"  
guraso ez-eukientzat,  
aldi atako bizi eziña  
gogoan badogu beintzat.  
Bederatzi aur, a ze kabia!,  
maitasuna jaki-gaitzat,  
ejenplu onik emon al bada  
au artu bear da aintzat.
- 4 Zenbat igurtzi ta txera gozo  
amak seigarren aurrari!  
Ze atsegiñez amets artean  
ugutz garbia edari!  
Zeru-grazia zeugan zendula  
izar ongilla gidari,  
ez da arritzeko urtez aurrera  
izatea bertsolari.
- 5 Ikastolara joan garaian  
aman altzotik aldendu,  
naiz altzo onek ikastolarik  
ederrena ematen du!  
Amak emona ain zan sagraua,  
gaur arte dozu mantendu,  
erdel maixuak nai eban arren  
egin izan eutzun kendu.
- 6 Amasei urtez morrontza latza,  
arrotza eta ligorra,  
bizi bearrak ezarri dauan  
nai eta ezko zigorra.  
Naiz ta bizitzan eziketa au  
izaten dan derrigorra,  
etxetik uxa, maite-girotik  
kanpo, beti da gogorra.

- 7 Ekaitza zenbat ta gogorrago  
maiteago aterpea,  
guda-giroan aberri-miñak  
biotz barruan golpea.  
Nagusi gerra-zale, morrontza,  
gutzat suberte torpea,  
gogoa bertsoz aseba baiña  
janari eske tripea.
- 8 Ondo ezia ez dau aldatzen  
aurka dagoan giroak,  
bakanak dira aldakuntzetan  
dabiltzan gizon eroak.  
Zure irautea ain da jatorra,  
epaituko du geroak,  
aberrri zarran alde doaz ta  
zure bertsozko tiroak.
- 9 *Gernika erre, Iturri-eri,  
Gure abadeak preso,  
Biotza samur edo Artetxe  
illargira nai dot jaso.  
Naparroako illerokoa,  
erbestetuen eraso,  
maitasunean izketan dozuz  
jarri seme ta guraso.*
- 10 Eguzkiaren brintza bezela  
argia da zure lana,  
biotz-taupadak mogitzen dauan  
odol beroak emana.  
Ain dozuz maite gure oiturak  
eta izkuntza laztana!  
Papel garbira ez da urtetan  
biotzez maite eztana.

11 Eritxi jator askoren jaube,  
bizitza iñon menpean,  
urte askoko pasadizua  
ezin argitu golpean.  
Buru-jaubetza lortuko balitz  
zuk nai zenduken epean,  
ainbeste egi ezta sartuko  
azaldu barik lurpean.

12 Orra amabi bertso moldatu  
eusko izkuntza edarrera,  
zure idazti atsegiñari  
gogoz egiñaz arrera.  
Nire naimenak bultzatzen zaitu  
maite dozun bearrrera,  
bertso-langintzan maixua zara  
eta jarraitu aurrera.

*Sarduy-tar Deunoro  
1986-ko Iñaki Deunaren egunean*



# Arkibidea

---

Azken arnasara arte .....	7
Nire bertso ondakiñak .....	13
Lazkao-txiki zanari .....	15
Bizkaiko gotzaiña .....	19
Tantaka .....	24
Lenengo jaunartzea .....	32
Bertsoaren bideetan .....	34
Arzallus eta Garaikoetxea .....	39
Biotz samindua .....	41
Gizon jator bi .....	51
Bilboko Kafe Antzokia .....	53
Arantzak .....	54
Urkiolan .....	62
Gudari zarrak .....	68
San Juanetan .....	71
Zeanuriko ermitetan .....	73
Ausnarketan .....	76
Umezurtzak lez .....	82
Gabonetan .....	84
Jesus etorri jakun .....	88
Eskerrak Zeanuriko omenaldian .....	93
Zeanuriko Andra Mari jaietan .....	96
Jesus Oleaga jaunari .....	100
Zeanuriko Txato aizkolariari .....	105
<i>Auspoaren auspoa</i> liburua .....	106
Ama Euskerari .....	110
Illetak .....	113
Meza santuan .....	117

Gaurko mundua .....	121
Balendin Enbeita .....	130
Balentin Berriotxo .....	133
Erriaren seme txarrak .....	136
Geure bidea .....	138
Bakearen alde .....	142
Itxaropenik ez galdu .....	150
Gorbeiaiko kurutzeari .....	154
Zeanuri .....	157
Gorbeiaiko artzain zarrak .....	164
Eskerrak emonez .....	167
Pelotea .....	170
Astoa .....	175
<i>Euskerazale</i> .....	180
Pazko egunez .....	183
Liburu andi galtsua eta txikia mamitsua .....	185
Azken bertsoa .....	188
Basilio Pujanari, Sarduy-tar Deunorok .....	189



1051090  
G-128/107



Basilio Pujana Etxeandia, Zeanurin 1913-II-27-an jaioa, Bizkaiko bertsolaririk zaarrenetako bat degu, kantari jarraitzen dutenetan beintzat.

1936-ko gerra aurrean bertsotan asia, ixilune luzea gorde bear izan zuan gero, andik ogei bat urtera bertsolari-txapelketak egiten asi ziran arte.

Aotik aora ez-ezik, bertsoak papererazten ere saiatua da. Ala, *Egi batzuek aixetaratzen* liburua eman zigun 1986-an (*Auspoa*, 191). Gerrateko oroipenak prosaz kontatu zituan 1991-an, *Deabruak ostutako urteak* liburuan (*Auspoa*, 211). Irugarrengo onek, berriz, bertso sendo-borobillak eskeintzen dizkigu, *Oiuak* alegia, batik-bat Euskal Erriaren egoera larria begien aurrean jartzen digutenak.

Larogei ta lau urte ditu bertsolari onek. Baiña ari errekiek ez botatzeko eskatzen digu, bere motorra gaur ere "martxan da bero dago ta". Urte askoan ala izan dedilla opa diogu.

ISBN 84 89080 60 7



G